


HEBREUX, KAPU YA YIYA

 . . . kele samu na kuzaba ya kulutila Mfumu ya beto ya kusakumuna. Mpe ya kele lukanu ya beto—ya beto na kuvukana awa, ya kele samu na lukanu yina, mpe, ntangu yayi, mpe samu na kusambila samu na bana ya Nzambi ya kubela. Mpe na suka yayi beto vwandaka me kuzwa lusakumunu ya kitoko na Masonuku.

² Beto ke na kumeka na kubaka, na konso ntangu ya lukutakanu, kitini ya . . . Mu ke na kulongaka na Buku ya Hébreux, mu ke na kusala yawu, ya me kuma mwa basabala ntangu yayi. Mpe ntangu yayi, kana Mfumu zola, beto ke landila na Kilumbu ya tatu na nkokila, na manima na Lumingu na suka mpe Lumingu na nkokila, kulandila, ntangu nyonso yina mu ke vwanda awa na ntangu yayi. Ya kele ve lukutakanu ya reveil, kasi ya kele lukutakanu ya reveil, lukutakanu na mutindu ya bankokila nyonso. Mpe na yawu beto kele kieleka, kieleka na kyese na kuzwa na ntangu yayi na kukutana na bankundi ya beto ya mbote yina kele na nziunga ya bambanza, mpe yina kele na nziunga ya Bambanza ya ba-Chute awa. Mpe kana—kana beto fwana sukisa to kima, ya lendaka vwanda ti Mfumu lendaka twadisa beto, ntangu mingi ve, na . . . beto lendaka kuzwa mwa bankokila, mu banza, na gymnase to kisika mosi, na manima ya mwa ntangu fyoti, kana Mfumu zola kutwadisa mutindu yina, na kisika beto lendaka nata bantu ya beto kintwadi.

Beto vwanda mona bantu yina vwandaka kwiza, mpe vwandaka vutuka na mbala mosi, na kutubaka, “Ya vwandaka ve na bisika samu—samu na kukota.” Kieleka, tabernacle kele fyoti mingi. Ya ke lungaka kaka kieleka, kieleka bantu ndambu, mpe beto kele kaka na kyese mingi ti beto me ndima na kukwiza mpe kuvwanda na tiya yayi, na kuwa Ndinga ya Mfumu. Mpe beto ke sambila ti Nzambi kusakumuna beno mingi, ya muvimba mpe kusadisa beno.

³ Mpe ntangu yayi, na nkokila yayi, beto zola, beto ke banda na ya 4 ya ka- . . . Bantu yikwa vwandaka awa na suka yayi? Bika beto mona maboko ya beno. Oh, ya kele mbote mingi, na kutala beno nyonso. Mpe beto kele na, ke na kubanda na, kapu ya 4 ya Buku ya Hébreux. Oh, wapi mutindu ya Buku ya ngitukulu! Beno ke na kusepela na Yawu? [Dibuundu me tuba, “Amen.”—Mu.] Mpe ya kele kufwanikisa Masonuku na Masonuku.

⁴ Mpe Paul, ntete yandi pesa kimbangi ya kimbangi ya yandi, yandi zolaka kwenda ntete na Arabie mpe kutala, na nzila ya Ndinga kana ya vwandaka Kieleka. Mu zola yawu. Mpe na lesu ya suka yayi, beto vwandaka me tala, na malongi ya suka yayi, ti Klisto vwandaka mutindu mosi mazono, bubu yayi, mpe

kukonda nsuka. Mpe Paul talaka ti Dikunzi ya Tiya mosi yina twadisaka bana ya Israël, kutanaka na yandi na nzila ya Damas. Beto monaka ti Dikunzi ya Tiya, yina twadisaka bana ya Israël na ntoto ya kuyuma, na yinsi ya nsilulu, kutanaka na Paul na nzila ya Damas, mpe bokilaka Yandi mosi, “Yesu.”

⁵ Kuna beto monaka Kinzambi ya kieleka ya nene ya Yesu Klisto. Buku ya muvimba awa kele kaka luzayikisu ya Yesu Klisto. Mpe Yandi me kwiza, beto talaka ti, “Na bantangu mingi mpe na mitindu mingi, Nzambi kuzonzaka na batata na nzila ya bapofete; na bilumbu ya nsuka yayi na nzila ya Mwana ya Yandi, Klisto Yesu, Yandi me monana Yandi mosi.” Mpe Buku katuka Genèse tii Apocalypse ya kele kima ve kasi luzayikisu mosi ya ntangu nyonso, ya mvula na mvula, ya Mfumu Yesu.

⁶ Mpe beto monaka ti Yandi vwandaka Yandi yina vwandaka na kati ya mulaka ya tiya. Beto monaka ti Yandi vwandaka Yandi yina vwandaka na Nzambi ntete mbandukulu ya yinza. Mpe beto monaka ti, na Ngwisani ya Malu-malu, Yandi vwandaka Nzambi mpe Muntu, kintwadi. Mpe kuna ntangu Yandi bikaka Ngwisani ya Malu-malu, samu na kukwenda na Mazulu, Yandi tubaka, “Mu me katuka na Nzambi, mpe Mu ke vutuka na Nzambi.”

⁷ Mpe na manima ntangu Paul kukutanaka na Yandi, Yandi vwandaka na mutindu mosi ya nzutu yina Yandi vwandaka ntangu Yandi twadisaka Israël, Dikunzi ya Tiya. Mpe Paul talaka Yandi mbala mosi na kizizi, yandi na kuvwandaka muntu yina me ndima ve, mpe ya salaka yandi kuzwa mpasi na meso tii nsuka ya bilumbu ya yandi. Yandi kumaka mpofo, mpe bilumbu mingi yandi lendaka ve kumona kima ata fyoti ve. Ba zolaka nata yandi na bala-bala yina ba ke bokilaka Kusungama.

⁸ Mpe Nzambi vwandaka na profete kuna na yina Yandi kuzonzaka, na nkumbu ya Ananias, yina kwendaka kuna, na nzila ya vision, mpe tetikaka maboko ya yandi na zulu ya Paul, mpe tubaka, “Mpangi Saul, kuzwa kumona ya nge.”

⁹ Mpe beto monaka, na manima, ti Mpeve-Santu mosi yango, ti Mfumu Yesu mosi yango, kwizaka na Pierre na nzutu ya Nsemo mpe vulusaka yandi na boloko.

¹⁰ Mpe beto monaka ti Mfumu Yesu mosi yango, na bilumbu yayi, kele dyaka na Dikunzi yango ya Tiya (Nsemo) yina ke na kutwadisa bantu ya Yandi (Dibuundu ya Yandi), ke na kusalaka kima mutindu mosi, ke na kupesaka ba-vision; ke kota mpe ke tentika maboko na zulu ya bantu, na nzila ya vision. Mfumu Yesu, Yina kutanaka na munu Lumingu yina me luta na suka na yinzo, mpe tubaka ya ke vwanda na muntu ke kwiza, na bansuki ya ndombi, yina ke na kukumaka mpeembe. Yandi vwandaka Grec. Kento ya yandi vwandaka ya bamvula ya kati-kati, mpe ti yandi ke vwanda na kudila na chaire.

¹¹ Bayankaka ya bawu tubaka yawu, mpe zabaka ti ya zolaka salama. Yandi vwandaka kaka kikata ve, nerf ya kitezo ya yintu

ya yandi sukaka. Yandi vwanda lenda kwandi ve kutwadisa makulu ya yandi to binama ya yandi. Mpe yandi vwandaka ya kufwa meso. Mpe samu na kupesa yawu kimbangi bambala zole: mu bokilaka mwa mama mosi na kwiza sambila samu na bantu ya kubela, na ntete, na manima kaka mpe mu bokila Mpangi ya bakala Thom na kwiza sambila. Mpe beto, vwandaka ya kuvwanda awa, vwandaka tala yawu mbote kukwenda na ntwala. Mpe na manima mu me kulumuka mpe me sambila bantu ya kubela, mpe me vutuka. Mpe kento yango me kwiza, kieleka kaka mutindu landila vision, mpe me simba munu na diboko mpe me banda na kudila, mpe tubaka Dokotolo Ackerman me fidisa bawu awa. Dokotolo Akerman kele mosi ya bankundi ya munu ya luzolo, yandi kele muntu ya Katolika. Mwana ya yandi ya bakala kele nganga-Nzambi na monastère na—na Saint Meinrad, mpe kuna na Indiana. Mpe muntu yayi vwandaka ya Jasper. Mpe Mfumu belusaka yandi, na fauteuil yina. Yandi telamaka mpe tambulaka. Yandi vwanda lendaka kumona mbote mutindu muntu nyonso yankaka. Mpe yandi basikaka na kivinga, ya kulunga mpe ya mavimpi ya mbote. Nyonso na nzila ya vision!

12 “Mpangi Saul, Mfumu Yesu yina monanaka na nge na nzila, me fidisa munu samu ti mu tetika maboko ya munu na zulu ya nge, samu ti nge kuzwa kumona mpe ti nge vwanda ya kifuluka na Mpeve-Santu.” Mbote mingi.

13 “Na manima beto monaka, na kumonaka ti beto me kuzwa mpulusu ya mfunu yayi, beto fwana ve...Beto ke kima ve bitumbu mpe nganzi ya Nzambi, kana beto tala mpamba mpulusu ya mfunu mutindu yayi.”

14 Ntangu yayi beto ke banda na kutanga, na nkokila yayi, na, mpe kubanda kapu ya 4 ya Buku ya Hébreux. Kana muntu ke zola kulanda kutanga, beto ke na mwa Babiblia awa. Kana bawu zola mosi, mbote, mosi ya ba-huissier ke natila beno yawu, kana beno telemisa diboko ya beno, Babiblia yayi—yayi. Kana mosi ya bampangi awa ke baka...Ya kele na Babiblia zole kuna, mu banza.

15 Mpe ntangu yayi beto ke sala nswalu, samu ti beto kele na kominyo na manima ya ntangu fyoti. Mpe kisika beto ke sukisa na nkokila yayi, na Kilumbu ya tatu na nkokila beto ke banda dyaka. Ntangu yayi, mu banza ti, na suka yayi na kutanga ya beto, beto bandaka na nzila ya 15.

16 Muntu mosi, lendaka zaba ve ti mu ke lwataka maneti, samu na kutanga. Mu ke na kukumaka kiboba. Mpe mu lenda dyaka kutanga, kasi mu lenda baka yawu ve na nswalu nyonso, kulutila ntangu ya kele fyoti, na bisono ya fyoti.

17 Mpe mu kwendaka samu na kusala bizama na meso ya munu, samu na kumona kana kieleka mu vwandaka zimbisa meso ya munu. Meso ya munu vwandaka kumi-kumi. Yandi tubaka, “Kasi nge me luta makumi yiya, mwana.” Yandi vwandaka na

kima mosi samu na munu ya kutanga, yandi tubaka, “Banda na kutanga yina.” Mu tangaka yawu. Mu landilaka na kubelama, ya vwanda kuma fyoti mpe fyoti. Mpe ya kumaka pene mutindu *yayi*, mu me telama. Na manima yandi me tula kuna kumi-kumi, mu vwanda lenda kutanga yawu na bisika nyonso. Kasi yandi tubaka, “Yinki ya kele, ntangu beno ke luta makumi yiya, globe oculaire ke patamaka.”

¹⁸ Ntangu yayi, mu lenda futika meso ya munu mpe kutanga kaka pene-pene *yina* na munu, kasi beno fwana futika meso. Na yawu, yandi me salila munu kaka maneti. Mu lenda mona yawu, bisika nyonso, na yina ya kele kieleka pene-pene ya munu. Ntangu yayi, na yina ya kele ntama na munu, mu lenda mona ata fyoti ve na bima yayi. Kasi mu ke tangaka yawu, mu ke tangaka na yayi na maneti.

¹⁹ Ntangu yayi, na suka yayi, beto bakaka kitini ya nsuka ya kapu ya 3 ya Hébreux. Mpe, oh, yinki bankuna yayi ya ntalu beto me kuzwa! Ntangu yayi beno kuwa, mu zola kutanga dyaka, samu ti beto kuzwa dibanza ntangu yayi. Kuzonzila yawu ve, kasi kaka mutindu ya kuluta fyoti na yawu.

Na yina ba me tuba, Bubu yayi kana beno . . . kuwa ndinga ya yandi, beno kanga ve bantima ya beno mutindu na ntangu ya kumanga kutumama.

Samu ti bayankaka, ya bawu, bawu kuwaka Ndinga, ntangu bawu kuwaka Ndinga, mangaka na kutumama: nyonso yina ve basikaka na Égypte na nzila ya Moïse.

²⁰ Ntangu yayi, na yina, na suka yayi, beto monaka ti Yandi tubaka, “Beni kanga ve ntima ya beno ntangu yayi, mutindu na bilumbu ya kusokisa.” Ya kele ntangu bawu sokisaka Nzambi na kudasuka, samu ti Yandi pesaka bawu Moïse, profete ya Yandi, mpe kidimbu yina vwandaka na Moïse. Bantu yikwa, na kalasi na nkokila yayi, zaba yinki kidimbu yina vwandaka? Dikunzi ya Tiya, Hébreux 13.

²¹ Ntangu yayi, beto zaba ve kana dibuundu kumonaka kidimbu yango to ve. Kasi Moïse monaka Yawu, samu ti Moïse kukutanaka na Yandi ntete na mulaka ya tiya. Yandi vwandaka Tiya. Mpe bana ya Israël kutumamaka na Moïse, mpe katukaka Égypte. Mpe na ntangu yina bawu basikaka na Égypte, Nzambi, beto monaka, twadisaka bawu mbala mosi na kati ya mutambu. Kisika, basoda ya Pharaon na manima ya bawu, Mubu ya Mbwaki na lweka yankaka, mpe Nzambi tulaka bawu na kumeka; mpe bawu kumaka na boma. Mpe ya sokisaka Nzambi. Yandi tubaka, “Samu na yinki nge ke na kudila na Munu?” Yandi tubaka, “Tuba kaka mpe kwenda na ntwala.” Mu zola yawu.

²² Ntangu yayi, bawu vwanda landa Moïse, mutindu Moïse vwanda landa Dikunzi mpe Dituti, mpe bawu vwandaka na nzila ya bawu na yinsi ya nsilulu. Kizizi ya kitoko mingi ya Dibundu, na nkokila yayi, na nzila ya beto na Yinsi ya

nsilulu, ya kutwadisa na Mpeve-Santu, bidimbu mpe mambu ya ngitukulu mosi mutindu Nzambi kuzonzaka.

²³ Ntangu yayi beno tala. Na manima, bawu kumaka na Ntoto ya kuyuma ya Sin. Bamaza vwandaka “ndudi,” *Mara*. Samu na yinki Nzambi twadisaka bawu na bamaza ya ndudi? Ya ke talana mutindu ti Yandi zolaka twadisaka bawu na maza ya mbote. Kasi Yandi twadisaka bawu na bamaza ya ndudi samu ti Yandi tesa lukwikilu ya bawu. Yandi ke zolaka kusala yawu. Yandi ke zolaka kubika bampasi kukwiza na zulu ya beto, kulakisa Yandi lenda kulakisa beno zola ya Yandi mpe ngolo ya Yandi. Wapi mutindu bantu lenda, bubu yayi, bayina ke kwikilaka ve na bisalu ya bimangu ya Nzambi, ntangu bampasi ke kwizaka, bawu ke bika kaka mpe ke landila kukwenda? Kasi beto ke kwikilaka ti “Nzambi ke salaka bimangu.” Yandi lenda ve . . . Nzambi fwana . . .

²⁴ Beno kuwa yayi. Kana Nzambi ke salaka ve mutindu mosi, ntangu mutindu mosi ya mambu ke salamaka, kuna Nzambi me zaba dyambu na kubakaka lweka mosi na ntwala ya bantu ya Yandi. Luzolo ya nene ya Nzambi ke lombaka na Yandi na kusala na konso dyambu mutindu Yandi salaka na dyambu ya ntete, kana ve Yandi vwandaka na foti ntangu Yandi salaka na dyambu ya ntete. Kana Nzambi sala ve na mutindu mosi Yandi salaka na dyambu ya ntete, kana Yandi ke sala mutindu yankaka na dyambu ya zole, kuna Yandi salaka foti ntangu Yandi salaka na dyambu ya ntete. Kana Nzambi belusaka bambevo na Ngwisani ya Ntama, Yandi fwana sala yawu na Ngwisani ya Malu-malu mpe bubu yayi, kana ve Yandi salaka foti ntangu Yandi belusaka bawu na bilumbu ya ntama kuna. Yandi fwana sala mutindu mosi, ntangu nyonso. Mpe Yandi ke sala yawu, ntangu lukwikilu mutindu mosi ke lungisa musiku. Foti kele na beto, na Nzambi ve. Samu ti beto ke mona Yandi kusala na bayankaka, mpe na baya mingi, bimangu ya nene ya ngitukulu. Beto zaba yawu. Muntu yina zola kusawula lenda tuba ve, “Ya kele kieleka ve.” Samu ti beto me mona kimbangi ya Yawu, mpe yawu yayi.

²⁵ Ba vwanda tubaka, “Lakisa munu kimangu.” Bawu lenda dyaka ve kutuba. Science lenda dyaka ve kutuba yawu. Beto lenda monisa yawu na mutindu ya kieleka na yinza ya science. Mpe yinza ya science me pesa kimbangi ti Moyo ya mazulu, na kifwani ya Dikunzi ya Tiya, kele na beto. Awa kele foto ya Yandi, kaka awa, mpe mosi kele ya kunamika na Washington, DC, na nkokila yayi. Ya kele Klisto mosi.

²⁶ Na yawu, mutindu na ntama, bankundi ya munu ya milongi vwanda tubaka na munu, “Oh, Mpangi Branham, ya kele dyabulu. Kuvunama ve na yawu.” Ya vwanda pesa munu boma.

²⁷ Mpe mu vwanda longa yawu ve tii Nzambi kwizaka mpe me monikisa yawu, ti, “Yandi kele Yesu mosi, Muntu yina mosi.” Oh, kuna beno meka na kukatula munu yawu? Ya lenda salama ve.

Samu ti, ya kele Masonuku. Ya kele Ndinga ya Nzambi. Ya kele ve kimbangi yina me kangama kaka mbote ve. Ya kele kimbangi yina kele ya kutelama na Ndinga ya Nzambi mpe nsilulu ya Seko ya kusakumuna ya Nzambi.

²⁸ Ntangu yayi, beto ke tala na lweka awa, kuna, ti Yandi tubaka.

Samu ti bayankaka, ntangu bawu kuwaka, mangaka na kutumama: . . .

Kieleka. Ba vwanda lemba, ntangu nyonso bawu vwanda kuma na kisika kutesa ya ngolo vwandaka kwiza. Na yina yinki bawu zolaka sala? Bawu vwanda natama, mpe vwanda lemba, mpe vwanda zola kuvutuka manima, mpe, “Samu na yinki yayi me salama na munu?”

²⁹ Kima ya ngitukulu, na suka yayi, na manima ya kulonga yawu kaka mutindu mu lendaka na ngolo nyonso, ya vwandaka na bantu mingi yina kwizaka na chaire mpe vwanda yufula Yawu, “Samu na yinki yayi me salama na munu?” Beno me mona mutindu Yawu ke kwendaka? Yawu ke lutaka na zulu ya yintu ya bantu. Ya kele kaka mutindu mosi, bantu.

³⁰ Yesu tubaka, “Beno kele na meso, kasi beno lenda mona ve.” Yandi tubaka yawu na bilandi.

³¹ Bawu tubaka, “Tala, ntangu yayi Nge ke na kuzonza pwelele. Ntangu yayi beto ke kwikila. Muntu ve me tubaka na Nge kima mosi, samu ti Nzambi me lakisa yawu na Nge.”

³² Yandi tubaka, “Beno ntangu yayi me kwikila, na manima ya ntangu nyonso yayi?” Beno me mona?

³³ Beno fwana yufula kima mosi ve, na Nzambi. “Samu ti makulu ya muntu ya kudedama kele ya kutuma na Mfumu.” Mpe konso kumekama yina kele ya kutula na zulu ya beno, ya kele samu na kuteza beno. Mpe Biblia ke tuba, “Ya kele ntalu mingi samu na beno kulutila wolo.” Na yawu kana Nzambi bika mwa bampasi ya pete-pete kukwiza na beno, beno bambuka moyo, ya kele samu na kusungika beno. “Konso mwana yina ke kwizaka na Nzambi fwana kuzwa ntete kubula ya Nzambi, mpe kuteza, ya kulongoka.” Ya kele ve na kima ya kubika na lweka. “Konso mwana yina ke kwizaka na Nzambi.” Mpe bampasi yayi ke salamaka, ya ke kwizaka, samu na kumona wapi nkadulu beno ke baka. Beno me mona? Ya kele Nzambi, na kisika ya kuteza yayi. Ya kele yina ntoto nyonso kele, ya kele kisika ya kuteza, mpe kisika Yandi ke na kumekaka na kuteza beno.

³⁴ Ntangu yayi beno kuwa, na yina beto ke na kukwenda na ntuala. Mpe mu zola kubaka kitini ya yawu ya nsuka.

Mpe na banani yandi zengaka ndefi ti bawu ke kota ve na kupema ya yandi, . . .

Ntangu yayi, ya kele kisika beto ke na kukumaka, na nkokila yayi.

. . . na kupema ya yandi, kasi na bawu yina kwikilaka ve?

Na yawu beto ke mona ti bawu zolaka ve na kukota . . . samu na kukondwa lukwikilu.

³⁵ Ntangu yayi, yinki kele disumu? Kukondwa lukwikilu. Nzambi kwizaka na bawu, na Dikunzi ya Tiya; me fidisa profete ya Yandi, mpe me kusa yandi, me pesa yandi bidimbu ya kusala na ntwala ya bantu. Mpe na manima Dikunzi ya Tiya, na nzila ya profete, basisaka bawu. Na ntwala ya konso dyambu yina bawu kukutanaka na yawu, bawu bandaka na kubokuta mpe vwanda tuba konso foti ya fyoti bawu monaka na Moïse, bawu bandaka na kungana mpe kubokuta na kuteleminaka yandi. Mpe Nzambi nyongaka, samu ti Yandi tubaka bawu vwandaka sumuka.

³⁶ Ba zolaka kuwa. Kasi, na kisika ya yina, bawu kuwaka nzila ya ndwenga, “Wapi mutindu ya lenda vwanda? Wapi mutindu bima yayi lenda vwanda?” Kana Yandi kele Nzambi, nyonso lenda salama. Mpe Yandi ke sala nyonso kutambula kintwadi samu na bumbote ya bayina zola Yandi.

³⁷ Ntangu yayi beto ke kota na kulongoka ya nene awa, ya kele, na “Kupema,” *saba*. Ntangu yayi, bawu vwandaka bizyeti na nzila ya bawu. Beno me mona? Bawu vwandaka na Égypte, bamvula bankama yiya, mpe na kati ya kimpika. Mpe awa bawu kubasikaka na nzila ya bimangu ya Nzambi, landila nsilulu ya Yandi. Mpe bawu vwandaka na nzila ya bawu na yinsi ya nsilulu. Mpe awa me monana Nsemo ya mazulu, na kati-kati ya bawu, mpe me banda na kutwadisa bawu.

³⁸ Awa, muntu lendaka tuba, “Ntangu yayi, beno tala awa, nani kele Moïse yayi? Nani me tula nge mfumu na zulu ya beto? Nge kele ve mosi ya beto? Nani me tula nge awa na kuvwanda mfumu ya beto? Nge banza ti nge zaba ya kulutila na pasteur ya beto? Nge banza ti nge zaba ya kulutila na nganza-Nzambi? Nge banza ti nge kele—nge kele ya kulutila mayela na bantu ya beto ya misambidi, ya kilumbu yayi?” Yina kele na kima mosi ve ya kusala na yawu.

Ya vwandaka Nzambi, na Dikunzi ya Tiya, na kusiamisaka ti Yandi vwandaka na kutambula yina. Ya vwandaka sala ata luswaswanu ve na yina vwandaka na mayela mpe yina vwandaka na mayela ve. Ya vwandaka dibanza ya kulanda yina Nzambi tulaka na ntwala ya bawu.

³⁹ Beto tala, Moïse, mutindu muntu, salaka kima ya bulawu ntangu yandi mekaka na kukuula bana na nzila ya Ndinga ya Nzambi, na kubasisaka nkonga ya bantu na ntoto ya kuyuma. Na yina yandi vwandaka na ya yandi . . . Beto tala, yandi vwandaka kibyadi ya nyonso yina vwandaka na bawu. Yandi vwandaka na zulu ya basoda nyonso, yina vwandaka, na yinza. Mpe kuna yandi vwandaka, mfumu ya nene ya basoda. Mpe kitezo yina vwandaka landa, yandi zolaka vwanda ntinu, Pharaon ya

Égypte. Mbote, yandi zolaka mata kaka na kiti ya mfumu, mpe kutuba, “Mbote mingi, bana, beno vutuka na yinzo ya beno.” Ya sukisaka dyambu; yandi vwandaka Pharaon. Kasi Moïse . . .

40 Oh, yawu yayi. Moïse, na *lukwikilu*, monaka nsilulu ya Nzambi. Mpe Wanzio ya Mfumu me kwiza na yandi, mpe yandi zabaka mingi na yina me tala Nzambi, na baminuti tanu na Ntwala ya Wanzio yango, kulutila na yina yandi longokaka bamvula makumi yiya na milongisi ya Égypte. Yandi zabaka ti Yandi vwandaka. Yandi monaka kimpeve kusala.

41 Yandi tubaka, “Mu ke vwanda na nge, Moïse. Mu ke tambula na ntwala ya nge.” Mpe bawu kubakulaka. Mpe Yandi pesaka yandi bidimbu ya kusala.

42 Ntangu yayi, bawu vwandaka na nzila ya bawu na yinsi ya kupema. Nzambi kubikaka bawu kupema, kisika bawu zolaka vwanda ve . . . ata mfumu ya bisalu na zulu ya bawu, na kupusa bawu, samu na kusala bawu kusala bima.

43 Wapi mutindu ya kizizi ya kitoko ya kele bubu yayi, ntangu beto ke tala Dibuundu mpe ke mona Dibuundu na mutindu ya yawu. konso muntu yina kele ya kubutama na Mpeve ya Nzambi ke na boma ya yinza, “Mpe kana beno zola yinza to bima ya yinza, zola ya Nzambi kele kwandi ve na kati ya beno.” Ya kele yina Biblia ke tuba. Mpe kiziyeti ya kieleka, na nzila ya yandi, ke zolaka kaka ve bima ya yinza. Yandi ke zolaka ve kumona bantu kunwa. Yandi ke zolaka ve kumona bantu kunwa tabaka. Yandi ke zolaka ve kumona bakento na bala-bala, ya kulwata mwa bilele yango ya ntama ya mvindu. Yandi ke zolaka ve kumona bansaka ya loto mpe ya bakate.

44 Mpe mazono, na yina Mpangi ya bakala Tony . . . to Mpangi ya bakala Wood mpe munu vwandaka luta na bala-bala, mpe bayankaka dyaka, ndambu ya bantu . . . Ya vwandaka na mwa mama kuna na Louisville, yina vwandaka kulumuka na bala-bala, mwa kento mosi na kutala ya luzolo, ya kulwata bilele yina vwandaka ke pesa boma; ya vwanda mata fyoti na zulu ya luketo, mpe mwa kitende mosi vwandaka ya kukanga na luketo, na balweka nyonso, mpe mwa kitini mosi ya kitende ya lele na ntwala, mpe ya kukanga na singa mosi na manima. Yandi vwandaka tambula na bala-bala, ke pesa boma, mpe bakala nyonso na bala-bala vwandaka tala yandi. Mu tubaka, “Yandi zaba ve ti yandi zaba dyambu, na meso ya Nzambi, na kusalaka kinsuza na bakala nyonso yina vwandaka tala yandi na mutindu yina. Mpe yandi ke pesa mvutu na kilumbu ya lufundusu na kusalaka kinsuza na babakala yango.”

45 Yesu tubaka, “Yina nyonso ke tala kento samu na kulula yandi, me sala yimeni kinsuza na yandi.” Ya kele kieleka.

46 Na yawu, beno me mona, Mpangi ya bakala Wood tubaka na munu, “Yinki ke sala yawu, Mpangi Branham?”

47 Mu tubaka, “Ya kele to ve déficence mentale to kuyala ya mpeve ya yimbi.” Ya kele kaka na bima zole na kusala yawu. Kento ya kulunga, ya kutsyema ke lwata ve bima yango; kana ti yandi kele ya kuyala na mpeve ya yimbi. Ya kele kieleka Kieleka.

48 Ntangu yayi, kizyeti yina kele na nzila ya yandi na Mazulu, yandi ke zingaka na atimosfere yankaka. Beno ke vwanda na boma ve na yina yandi ke tala yandi. Yandi ke balula yintu ya yandi kana yandi kele na Nzambi na kati ya ntima ya yandi, samu ti yandi ke zinga na atimosfere mosi yina kele mafuku ya bakilomete ntama na bima yango. Ya kele kieleka. Beno zola ve kuvwanda ya kubwa na kima yina, na lusambusu. Na yawu yandi balukaka yintu ya yandi mpe tubaka, “Nzambi, tala kyadi na kento yayi,” mpe yandi kwendaka na ntwala. Beto kele na nzila. Beto kele na nzila ya beto na Yinsi ya Canaan. Beto kele na nzila ya beto na Kupema yango ya kusakumuna mpe ya Seko yina Nzambi me pesa beto. Mpe na nzila, beto kele ya kumekama. Beto kele ya kumekama na mitindu nyonso ya bima, kasi dyaka ya kumekama kukondwa kusumuka.

49 Ntangu yayi beno tala, na yina beto ke na kukwenda na kapu ya 4, “Ti beto na yina kuvwanda na boma.”

Ti beto na yawu kuvwanda na boma, na yina ti, nsilulu yina pesamaka na beto na kukota na kupema ya yandi, . . .

50 Mu zola beno kubambuka moyo, ti, kana ti beto tala, kana ti Nzambi kumonikisa yawu na beto! Ata bambala beto ke kwendaka na dibuundu, ya kele na kima mosi ve ya kusala na yawu. Nzambi fwana kwiza na nzila ya luzayikisu mpe kumonikisa Yandi mosi na beto, yina ke basisa bima nyonso ya yinza. “Ntangu yayi, na yina ya kele ya kutuba, ‘Bubu yayi kana beno. . .’”

51 Ntangu yayi beto banda na kapu 4.

Ti beto na yawu kuvwanda na boma, na yina ti, nsilulu yina pesamaka na beto na kukota na kupema ya yandi, . . .

52 Ntangu yayi beno bambuka moyo, ntangu bawu vwandaka na nzila na Kupema, Dikunzi ya Tiya vwandaka twadisa bawu. Ntangu yayi beto zola kutala, “Yini kele Kupema yayi?”

Ti beto . . . boma, na yina ti, nsilulu yina pesamaka na beto na kukota na kupema ya yandi, (beno tala mbote), ti mosi ve ya beno kulembana na kukota.

53 Ntangu yayi, awa kele nsilulu. Awa kele yina beto fwana vwanda na boma: kana ya kele ve na nsilulu yina me bikana samu na beto. Kasi ya kele na nsilulu! Mpe kuna, kima yina ke landa, ti beno lemba ve na kukota.

54 Ntangu yayi, dibanza kele, kana beto kele na nzila ya beto na Kupema, yinki kele Kupema? Wapi kisika ya kele? Ya kele

kuvwanda ya dibuundu? Ya kele ya kuvwanda ya kubotika na mutindu mosi? Ya kele kukuma mambele mosi ya dibuundu ya kulutila nene ya mbanza? Kulwata bilele ya mbote? Ya kele ndongosolo? Ya kele mbongo, samu ti beto kima kisalu mpe kuvwanda kaka na yisi, kupema luzingu ya beto nyonso, mutindu beto ke bokilaka yawu? Ya kele yawu ve.

⁵⁵ Beno kuwa yinki Biblia ke tuba ti ya kele, mpe wapi mutindu beto ke kuzwaka yawu.

Ti beto na yawu kuvwanda na boma, na yina ti, nsilulu yina pesamaka na beto na kukota na kupema ya yandi, ti mosi ve ya beno kulembana na kukota.

Samu na beto (na bilumbu yina) nsangu ya mbote kulongamaka, mbote mutindu mosi na bawu: . . .

Yinki kele Nsangu ya mbote? Mambu ya mbote. Mambu ya mbote kwizaka na bawu na Égypte, ti, “Nzambi me fidisa mukudi, mpe Yandi ke basisa beto mpe ke nata beto na yinsi ya nsilulu.”

⁵⁶ Mambu ya mbote samu na beto ntangu yayi, ti, “Nzambi me fidisa Mukudi, Mpeve-Santu, mpe beto kele na nzila na Yinsi ya nsilulu.” Awa bantu me sala yawu ba-credo mpe ba-dénomination, kasi Nzambi ke kangama kaka ti, *Kupema* ya beto kele “Mpeve-Santu.”

⁵⁷ Beno tala.

. . . nsangu ya mbote kulongamaka. . . na bawu mbote mutindu mosi na beto: kasi mambu yina ba longaka sadisaka bawu ve, na . . .

Beno bambuka moyo:

. . . mambu yina ba longaka sadisaka bawu ve, samu ti yawu kutanaka ve lukwikilu na kati ya bayina vwandaka kuwa yawu.

⁵⁸ Oh, bankundi ya munu, beno bika munu kutelama minuti mosi awa. Ata yinki mutindu Ndinga me longama, wapi mutindu mbote beno ke zola mutindu Yawu me longama, kana ti beno beno mosi ve kele muntu yina ke kota na Yawu, Yawu ke sala beno ata fyoti ya mbote ve.

. . . samu ti yawu kutanaka ve lukwikilu na nzila ya bayina vwandaka kuwa yawu.

⁵⁹ Bawu kumonaka bimangu ya Moïse. Bawu tubaka, “Ya kele mbote mingi.” Mpe bawu kubelamaka. Bawu-bawu monaka yandi kusala bimangu. Mpe bawu kumonaka Dikunzi ya Tiya, mu banza, to kuwaka bawu kuzonzila Yawu. “Oh, ya kele nyonso mbote.”

⁶⁰ Kasi ya vwandaka ve ya kukutana na lukwikilu ya muntu yandi mosi. Samu ti ntangu bawu kumaka na ntoto ya kuyuma, bawu (mosi na mosi) bandaka na kubokuta. Mpe Nzambi tubaka,

“Samu ti bawu salaka ntembe, ya vwandaka disumu.” Beno sala ve ntembe na kima mosi. Beno kwikila. Beno sala ntembe ve, ya lenda vwanda yinki mutindu ngolo dyambu kele, beno kwikila Yawu.

⁶¹ Awa bawu me banda na kubokuta, mpe Nzambi kufwaka bawu. Mpe kuna Yandi zengaka ndefi, na nkele ya Yandi, ti, “Bawu ke kota ata mbala mosi ve na Kupema ya Yandi.” Mpe Biblia ke tuba awa, mu banza ti Yawu kele na kapu ya 3, ti, “Bamvumbi ya bawu kubwaka na ntoto ya kuyuma.”

⁶² Kapu ya 3 mpe nzila ya 17.

Kasi na bayina yandi vwandaka ya kudasuka bamvula makumi yiya? ya vwandaka ve na bayina sumukaka, mpe bayina bamvumbi kubwaka na ntoto ya kuyuma?

⁶³ Mpe na bawu nyonso yina basikaka na Égypte, kaka zole kotaka na yinsi ya nsilulu. Na yinza ya muvimba ya ntangu ya ntama, na bilumbu yina lutaka, ya vwandaka na myoyo nana yina vulukaka, na kati ya byazi. “Mwelo kele fyoti mpe ya kulutila fyoti kele nzila, mpe kasi ya kele na ndambu yina ke mona yawu.”

⁶⁴ Bantu yankaka ke tuba, “Na yina, Mpangi Branham, wapi mutindu samu na yina me tala mafunda nyonso yayi yina Biblia ke tuba ke monana kuna?”

Bambuka kaka moyo na lutangu yina kufwaka na konso nsungi, yina vwandaka Miklisto, nzila nyonso na nsungi ya bawu. Bawu nyonso ke vumbuka. Ya ke sala Nzutu. Beno ke na kuingila ti ya vwanda na nkama ya byazi na Amerika yayi, yina ke basika, to bisika yankaka, na yinza yayi bubu yayi. Ya lendaka vwanda ve na makumi tanu yina ke basika. Kasi Dibuundu ya nene yina ba me kuula kele ya kulala na fundu-fundu, ke na kuingilaka. Bawu kele matadi ya ntalu ya Nzambi yina ke na kupemaka na fundu-fundu. Kasi mioyo ya bawu kele na yisi ya autel ya Nzambi. Bawu kele ve na kitezo ya bawu ya kulunga. Bawu kele na kati ya nzutu mosi, kieleka, kasi théophanie. Mpe bawu ke na kubokaka na Nzambi, “Bantangu yikwa?” Bawu vwanda lenda kumona mosi na yankaka, kasi bawu vwanda lenda ve kupesana maboko mosi na yankaka, na mutindu ya nzutu yina.

⁶⁵ Beno ke kutana na mama ya beno na nkembo na nkokila yayi, kana beno kwenda, beno ke lenda ve kupesa yandi diboko samu ti yandi kele ve na mutindu yina ya diboko. Beno ke lenda ve kuwa yawu mutindu beno ke kuwa ntangu yayi. Samu ti, bambakusulu tanu ya nzutu kele ya kutula na nzutu yayi, samu na kutwadisa yawu. Mvwandulu ya yandi ke talana na kati ya atimosfere yankaka.

⁶⁶ Ya kele mutindu bakala mpe kento. Kukwela ke vwanda ve, to kupesa na makwela, na Mazulu. Samu na yinki? Samu ti ya kele na mutindu yankaka ya luzolo. Nsatu ya kuvukisa banzutu

ke vwanda ve. Bima nyonso yango me luta. Beno kele ya kuvedisa mpe ya kuvedila.

Kasi beno me zingaka ntete ve na kitezo yina, na yawu beno vangamaka ve samu na kitezo yina. Beno ke na kuvingilaka kaka kuna. Kasi beno ke na nsatu ya kuvutuka kisika ba vangaka beno bakala mpe kento, mpe kuna Nzambi ke vumbula nzutu yango na fundu-fundu ya ntoto mpe ke kembisa yawu. Kuna beno ke mona, ke kuwa na yinwa, ke simba, ke kuwa nsunga, mpe ke kuwa, mpe kuzinga pene-pene. Beto ke zaba ata fyoti ve . . .

Ata mbala mosi ve ti beto ke sepela na luzingu ya Bawanzio. Beto vwandaka ya kuvanga ve Bawanzio. Nzambi vangaka Bawanzio. Kasi Yandi vangaka beno mpe munu, babakala mpe bakentio. Ya kele kitezo na kati ya yina beto ke vwandila, ntangu nyonso, na Nkwizulu ya Yandi ya kusakumuna.

⁶⁷ Ntangu yayi, beno me mona mutindu ba katulaka bawu, samu ti bawu kusumukaka, mpe kondwaka nkembo. Nzambi lakisaka bawu Dikunzi ya Tiya. Yandi lakisaka bawu bidimbu mpe mambu ya ngitukulu. Yandi basisaka bawu. Yandi lutisaka bawu na mpukumunu, samu na kumeka mpe kuteza bawu.

⁶⁸ Ntangu yayi, beno kele ve na bampukumunu mingi? Beno nyonga ve samu na yawu. Beno sepela. Nzambi kele na beno. Yandi ke na kumekaka na kuteza lukwikilu ya beno. Beno tala Job na Ngwisani ya Ntama, ntangu Yandi tubaka, “Nge me tala kisadi ya Munu Job, muntu ya kusungama, muntu ya kulunga? Ya kele na ata mosi ve mutindu yandi na zulu ya ntoto.”

⁶⁹ “Oh,” yandi tubaka, “kieleka, Nge me keba yandi: yandi kele na ata mambu ve, ata manyongo ve. Yandi kele na ata dyambu ya mbongo ve, nyonso kele mbote. Yandi kele na ata kimbevo ve, ata mpasi ve. Bika ti mu kuzwa yandi. Mu ke sala yandi kusinga Nge, na ntwala ya Nge.”

⁷⁰ Yandi tubaka, “Yandi kele na diboko ya nge, kasi kubaka luzingu ya yandi ve.”

⁷¹ Oh! Yandi salaka nyonso kasi kondwaka kubaka luzingu ya yandi, kasi yandi lendaka ve na kuningisa Job. Job kuzabaka ti yandi kutelamaka ngwi na Ndinga. Ya kele kieleka. Mpe bampeve nyonso ya yimbi na difelo lendaka ve na kuningisa yandi, samu ti yandi zabaka ti yandi pesaka munkayulu yina. Yandi vwandaka ya kusungama. Mpe bawu fundaka yandi, na kutubaka, “Nge me sumuka, Job, mpe Nzambi ke na kupesaka nge kitumbu.” Yandi zabaka ti Nzambi vwandaka ve . . . ti yandi sumukaka ve na ntwala ya Nzambi. Yandi zabaka ti yandi vwandaka ya kusungama. Ve samu ti yandi vwandaka muntu ya mbote, kasi samu ti yandi vwanda ndima munkayulu yina ba pesaka na kisika ya yandi.

⁷² Mpe, na nkokila yayi, beto zaba ti luzingu ya yandi vwandaka lakisa ti yandi vwandaka ya kusungama. Mpe ntangu beno . . . Ve samu na kumeka na kukwenda na yinzo na Nkembo

samu ti beno me meka na kusadisa mfinangani ya beno; yina kele mbote. Ve samu ti beno me kuma ya dibuundu; yina kele mbote. Kasi beno ke kwenda na yinzo na Nkembo samu ti beno me ndima ludedomo ya Yesu Klisto, kima ve ti beno me sala beno mosi.

73 Ntangu yayi, na yina beto ke landila na kutanga.

Samu na beto nsangu ya mbote kulongamaka, . . . (nzila ya 2) . . . mbote mutindu mosi na bawu: kasi ndinga yina ba longaka sadisaka bawu ve, samu ti yawu kutanaka ve lukwikilu na kati ya bayina vwandaka kuwa yawu.

Lukwikilu vwandaka ve na kati ya bayina vwandaka kuwa Ndinga.

74 Beno banza kaka, bubu yayi, na mwa, kisalu ya kulemvuka yina Mfumu me pesa munu, ya zolaka vwanza na makumi yiya ya mafuku ya bantu ya Amerika yina me vuuka, na nkokila yayi. Beno zaba yinki bawu ke tubaka? “Beto tala, ya kele mabanza ya bantu. Yandi kele muntu ke tangaka bangindu. Ata kima ya mbote na yawu! Beto tala, yandi kele ve na dibuundu ya beto.” Beno me mona? Ya kele ve . . . ata bambala beno ke tula yawu na Ndinga mpe ke lakisa ti ya kele Ndinga ya Nzambi, ya kele nsilulu ya Nzambi, ata bambala science ke lakisa ti Yawu kele kieleka, dyaka bawu ke kwikila ve. Biblia ke tuba ti bawu lenda ve.

75 Beno ke tubaka, “Na yina samu na yinki ya kulunga Yawu? Nzambi fwana kuzwa mbandi, samu na kufundisa bawu, na Kilumbu yango. Ndinga kulongamaka mpe me pesa kimbangi na kati ya bawu, mpe dyaka na kati kukondwa ya bawu ya kuzaba bawu me kwenda. Ya kele ve na kima me bikana kasi lufundusu. Nzambi lendaka ve na mutindu ya kulunga—lendaka ve na mutindu ya kulunga kusambisa yinsi kana ti yawu kuzwa kyadi ntete yawu kuzwa lusambusu. Yandi kele Nzambi. Yandi lendaka ve kusala yawu.

76 Ntangu yayi yinki beto ke tuba?

Samu na beto bayina . . . me kwikila mpe me kukota na kupema, mutindu yandi tubaka, Mutindu na nganzi ya munu mu zengaka ndefi, bawu ke kota ve na kupema ya munu: ata ti kisalu kumanisaka katuka mbandukulu ya yinza.

Samu ti yandi tubaka na kisika mosi na zulu—zulu ya kilumbu ya sambwadi, . . .

77 Ntangu yayi, mu zola ve kunyongisa bakuwa ya bantu, na kuteleinaka nsambulu ya bawu. Ya kele ve lukanu ya munu. Kuna na bilanga ya kulunga, mu ke longaka kaka malongi ya nene ya kumwangisa nsangu, ya kukangama na misiku, ya ntangu nyonso. Kasi na tabernacle, na kati-kati ya bana ya munu

awa, Mu ke tala ti mu kele na muswa ya kulonga yina mu banza kele Malongi mpe Kieleka. Beno me mona? Mu banza ti ya kele ya kulunga.

⁷⁸ Ntangu yayi, mu kele na mafunda ya bankundi ya mbote yina ke zitisaka Saba, bantu yina kele ba-Adventiste ya Kilumbu ya Sambwadi. Ndambu ya bankundi ya luzolo mingi yina kele na munu, ndambu ya bawu kele ba-Adventiste ya kilumbu ya Sambwadi.

Ata, kuningana ya nene, yina ba ke bokilaka *Ndinga ya Profesi*, bawu kele kieleka ya kutelemina munu. Bawu tubaka ti mu pesaka nsamununu na chaire, mpe mu tubaka ti, “Mu vwandaka Nzambi. Mpe ti—mpe ti Nsemo yayi yina vwandaka landa vwandaka Wanzio, mpe ti mu vwandaka Nzambi. Mpe ti mu me kwiza na yinza samu na kusala bima ya nene, samu na kulakisa bantu ti mu vwandaka Nzambi.” Mbote, ya kele yina *Ndinga ya Profesi* tubaka na zulu ya munu, kuna na Californie. Mpe muntu nyonso yina tubaka yawu, beno zaba, tubaka kima mosi, yina vwandaka kieleka ve.

⁷⁹ Kasi na kisika ya ntete, ve samu na kutelemina dibanza ya dibuundu ya ba-Adventiste ya kilumbu ya Sambwadi to ata dibuundu nyonso yina ke zitisaka Saba, kasi kaka samu na mbote ya Nsangu ya mbote. Beto ke kwenda, na baminuti fyoti, na Pantekote, mpe. Yinga. Kieleka. Na ba-Baptiste, beto ke kwenda na yawu mpe ke lakisa ti Nzambi ke zolaka ata dénomination ve. Ya kele kieleka. Yandi ke zolaka kaka muntu yandi mosi. Mpe Yandi ke salaka na ata dénomination ve, ata mbala mosi ve Yandi me salaka mpe Yandi ke salaka ata mbala mosi ve, landila *Ndinga ya Yandi*. Kasi Yandi ke salaka na mosi na mosi na konso dénomination. Yinga, ya kele na mosi na mosi ti Nzambi ke salaka.

⁸⁰ Ntangu yayi beno kuwa yayi mbote-mbote, mpe kana ntete, na ntangu mosi, ti kyuvu yina me kwizaka ntete na beno, ya ke sukisa dyambu. Ntangu yayi, ti Mfumu kusadisa beto.

⁸¹ Ntangu yayi, beno landa mbote, “Samu ti . . .” Nzila ya 4.

Samu ti yandi zonzaka na kisika mosi na kilumbu ya sambwadi, . . .

⁸² Ntangu yayi beno tala mbote. Yandi ke na kutubilaka na yina me tala saba. Bantu yikwa zaba yina mpova *s-a-b-a* na Hé- . . . ya kele mpova ya Hébreux yina zola kutuba “k-u-p-e-m-a”? Bantu yikwa zaba ti ya kele yawu, na Kingelesi? Kieleka. *Saba* ke wakana ve mutindu mpova mosi ya kusekisa? Ya kele.

⁸³ *Kusantisa* ke wakana ve mutindu mpova ya kusekisa? *Kusantisa* kele mpova ya Grec. *Kusantisa* zola kutuba “me kumisa santu.” Na Hébreux, ya zola kutuba “kukumisa santu.” Na Grec, ya zola kutuba “kusantisa.” Na Kingelesi, ya zola kutuba “kukumisa ya kuvedila.”

84 *Saba* zola kutuba “kilumbu ya kupema.” Ya kele yina saba ya ntama vwandaka, kilumbu ya kupema. Ntangu beno ke mona *kupema*, ya zola kutuba “saba.” Beno tala yawu na mikanda ya ntete, kana beno kuzwa bweso ya Biblia ya Grec, mpe beno tala kana mpova . . . Kana beno kele na Biblia ya Scofield, beno tala bisono ya beno na lweka na “kupema” mpe kumona kana ya ke vutula beno ve na *saba*. *Saba* zola kutuba “kupema.” Mbote mingi.

85 Ntangu yayi beno tala mbote.

Ti beto na yawu kuvwanda na boma, na yina ti, nsilulu yina pesamaka na beto na kukota na saba, na kupema ya yandi, . . .

86 Ntangu yayi, bantu mingi ke zitisaka bilumbu, mutindu kuzitisa *Sabala* kilumbu ya saba. Bayankaka ke salaka Lumingu kiteki, kilumbu ya kusambila. Mpe na lemvo ya Nzambi, mpe na nzila ya Ndinga ya Nzambi, Nzambi sadisa munu na nkokila yayi, mu lenda lakisa na beno ti bawu nyonso zole kele na foti. Bawu nyonso zole musambidi ya Lumingu mpe muzitisi ya saba, bawu nyonso zole kieleka kele na kyeta landila Ndinga. Mpe na manima ya nyonso, ya kele na Ndinga ti beto fwana telama, ve na yina ba-Adventiste ke tubaka, to ve na yina ba-Protestant ke tubaka, to bantu ya Katolika ke tubaka. Ya kele yina Biblia ke tubaka.

87 Ntangu yayi, awa beno tala mbote.

Samu ti yandi tubaka na kisika mosi na kilumbu ya sambwadi, . . .

Ntangu yayi beto ke tula kima mosi mutindu yayi, mpe kubokila yayi–yayi, “Kupema ya Nzambi,” kilumbu ya sambwadi.

88 Ntangu yayi beno tala mbote. “Mpe Nzambi . . .” Beno kuwa Masonuku yayi ntangu yayi.

. . . Nzambi kupemaka kilumbu ya sambwadi na kisalu ya yandi nyonso.

Nzambi kuzwaka Saba, mpe kilumbu yango ya sambwadi vwandaka funda mosi ya bamvula yinda, kifwanusu ya Millénium.

Samu ti yandi tubaka . . . na kilumbu ya sambwadi, Mpe Nzambi kupemaka . . . na kisalu ya yandi—ya yandi nyonso.

Kiyingilu ya muntu, “Bisalu ya Yandi nyonso.” Yandi kupemaka na kilumbu ya sambwadi. Ya kele Nzambi.

Mpe na kisika yayi (na yisi ya musiku), Bawu ke kota ve na kisika ya munu ya kupema.

89 Nzambi kupemaka, na nzutu, samu ti Yandi salaka mazulu mpe ntoto na bilumbu sambanu, mpe na kilumbu ya sambwadi

Yandi kupemaka na kisalu ya Yandi nyonso. Yandi kupemaka funda mosi ya bamvula. Samu ti Biblia ke tuba, ti, “Kilumbu mosi na zulu ya ntoto kele funda ya bamvula na Mazulu; funda ya bamvula na Mazulu ya kele kilumbu mosi na zulu ya ntoto.” Bantu yikwa zaba ti Masonuku ke tuba yawu na Zole ya Pierre? Mbote mingi. “Nzambi kupemaka na kilumbu ya sambwadi. Mpe Yandi kutubilaka na yayi na kisika mosi.”

⁹⁰ Ntangu yayi beno kuwa mbote.

Samu ti yandi zonzaka na kisika mosi na kilumbu ya sambwadi, Mpe Nzambi kupemaka. . . na bisalu ya yandi nyonso.

Mpe na kisika yayi yankaka, (musiku) Bawu ke kota ve na kisika ya munu ya kupema.

Yandi pesaka ba-Juif, na nzila ya bawu katuka yinsi ya nsilulu, to, katuka Égypte na yinsi ya nsilulu, saba ya kilumbu ya sambwadi.

⁹¹ Ntangu yayi beno kuwa.

Na kumona na yawu ya kele dyaka na bayankaka yina fwana kukota, mpe na bawu bayina na mbala ya ntete yawu kulongamaka. . .

Kupema! Nzambi pesaka bawu musiku, mpe saba vwandaka musiku ya yiya.

. . . kotaka ve samu na kukondwa lukwikilu: . . .

⁹² Ntangu yayi beno tala mbote. Yandi ke na kuzonzaka na yina me tala musiku, mutindu bawu kotaka, ya vwandaka ve ya kuvukana na lukwikilu. Bawu vwanda zitisa ve yawu. Bawu vwandaka zitisa saba samu na kubambuka moyo, ti bawu vwandaka kwenda na yinsi ya saba, samu na kuzwa kupema ya ntangu nyonso ya bamambu nyonso ya bawu mpe ya manyongo nyonso ya bawu, dyaka ve bamfumu ya bisalu, dyaka ve bampimpa ya mpasi. Bawu vwandaka na nzila ya bawu na yinsi ya nsilulu ya kupema. Kisika miliki mpe bwiki vwanda lutaka. Kisika bambuma ya vinu vwandaka nene mingi ti bantu zole zolaka nata kikunku mosi na zulu ya mapeka ya bawu. Oh, wapi yinsi ya kusakumuna ya kupema! Kasi bawu kondwaka na kuzwa yawu ntangu bawu kumaka kuna, samu na kukondwa lukwikilu ya bawu. Ba balulaka bawu, na yina ya vwandaka kaka na bakilometele makumi sambanu na tanu katuku kisika bawu katukaka na Égypte, na yinsi ya nsilulu. Mpe bawu vwandaka bamvula makumi yiya na kukuma kuna, samu na kukondwa lukwikilu ya bawu. Nzambi pesaka bawu profete ya bawu, pesaka yandi kidimbu ya Yandi, pesaka yandi Dikunzi ya Tiya, lakisaka bidimbu mpe mambu ya ngitukulu, mpe longaka bawu Nsangu ya mbote. Mpe bawu vwandaka kwenda, kusosa bambisi mpe mampa, mpe bawu kubwaka na

ntoto ya kuyuma. “Mpe bamvumbi ya bawu kubebaka na ntoto ya kuyuma.”

⁹³ Yesu, na yinto ya maza, Yandi tubaka.

Yandi tubaka, “Batata ya beto kudyaka mani na ntoto ya kuyuma, bamvula makumi yiya.”

⁹⁴ Yandi tubaka, “MU KELE Dimpa ya Luzingu yina me katuka na Nzambi na Mazulu. MU KELE Dimpa ya Luzingu. Moise kupesaka beno ve Dimpa yango. Tata ya Munu ke pesaka Dimpa yina. Mpe MU KELE Dimpa yina me katuka na Nzambi na Mazulu. Kana muntu kudya Yayi, yandi ke kufwa ata mbala mosi ve.” Beno tala luswaswanu.

⁹⁵ Ntangu yayi beno tala mbote. Bawu tubaka ti Yandi. . . “Bawu kunwaka na Ditadi yina vwandaka na ntoto ya kuyuma, na kati-kati ya bamvula *mingi*.”

⁹⁶ Yandi tubaka, “MU KELE Ditadi yango.” Nkembo na Nkumbu ya Yandi ya Santu! “MU KELE Ditadi yango.”

Wapi mutindu Yandi zolaka vwanda Ditadi yango? Ditadi yango vwandaka Ditadi ya kimpeve. Yawu vwandaka landa bana ya Israël. Mpe Moïse vwandaka na yinti na diboko ya yandi, ya vwandaka yinti ya lusambusu ya Nzambi. Mpe Nzambi tubaka na yandi na kubula Ditadi, mpe yandi bulaka Ditadi. Mpe na yina yandi salaka, bamaza kubasikaka na Ditadi. Mpe Klisto vwandaka Ditadi yango, mpe lusambusu ya kitumbu ya disumu ya Nzambi kubwaka na zulu ya Yandi. “Nzambi tulaka na zulu ya Yandi disumu ya beto nyonso ya nko,” mpe disumu yango ya nko tobulaka ntima ya Yandi. Mpe ntima ya Yandi me tsyamusa Mpeve-Santu, mutindu banzadi ya maza, samu na bantu yina vwandaka beba, vwandaka kufwa.

“MU KELE Ditadi yango yina vwandaka na ntoto ya kuyuma.”

“Kasi,” yandi tubaka, “Nge zola kutuba. . .”

⁹⁷ Yandi tubaka, “Moïse, muntu yina tubaka na beno yawu, yandi vwandaka sosa kumona kilumbu ya Munu. Mpe yandi monaka yawu na ndambu.”

⁹⁸ Yandi tubaka, “Ntangu yayi, Nge zola kutuba na beto ti Nge kele ya kulutila nene na Moïse? Ti Nge monaka Moïse? Mpe Moïse vwandaka ya kufwa bamvula bankama nana.” Yandi tubaka, “Ntangu yayi beto me zaba ti Nge kele na mpeve ya yimbi,” na mutindu yankaka, kilawu. “Beto zaba ti Nge kele kilawu.”

⁹⁹ Yandi tubaka, “Ntete Abraham kuvwanda, MU KELE. Mu vwandaka YA NENE MU KELE yina vwandaka na divunda ya tiya. Mu kele Tiya yango yina vwandaka na divunda ya tiya. Mu kele Wanzio yango yina vwandaka kwenda na ntuala ya bawu.” Mpe Yandi tubaka, “Mu me katuka na Nzambi, mpe Mu ke na kuvutuka na Nzambi.” Mpe Yandi katukaka na Nzambi, kumaka

nsuni mpe zingaka na kati-kati ya beto; me vutuka na mutindu mosi ya Dikunzi ya Tiya.

Mpe awa Yandi kele, na nkokila yayi, na manima ya bamvula mafunda zole, “mutindu mosi mazono, bubu yayi, mpe kukondwa nsuka,” ke na kusalaka kima mosi, na kutwadisaka bana ya Yandi ya kusakumuna.

¹⁰⁰ Mpe mingi ke na kwizaka . . . na kati samu na kukondwa lukwikilu. Ntangu yayi, yandi tubaka, “Yandi zengaka kilumbu,” kilumbu ntangu Nzambi manisaka kisalu ya Yandi. Na manima, “Yandi zengaka ‘kilumbu yankaka,’ mpe na dyambu yayi, ti kana bawu ke kuwa, kana bawu ke kwiza, ti zitisa basaba, ke landila bangonda ya malu-malu mpe nyonso yina.” Ya kele kisika bankundi ya ba-Adventiste ke mekaka na kuvutula beno.

¹⁰¹ Ntangu yayi beto landila na kutanga. Beno tala.

Na kumona na yawu . . . yina fwana kukota, mpe bawu bayina yawu kulongamaka na mbala ya ntete kotaka ve samu na kukondwa lukwikilu.

¹⁰² Ntangu yayi, nzila ya 7. Oh, la la! Mu ke tuba ti, Masonuku kele dibanza ya kimpeve na kulandilaka mathématique. Mu ke tuba, Masonuku kele, mpe na mutindu nyonso, me twadisama na kimpeve. Ba-mathématique ya Biblia kele ya kulunga.

¹⁰³ Beno me tala ti États-Unis yayi kele lutangu kumi na tatu na nyonso yina yawu ke salaka? Beno zaba ti ya vwandaka na bakoloni kumi na tatu na mbandukulu ya yawu? Beno zaba ti dalapo vwandaka na bambwetete kumi na tatu na ntonono ya yawu? Beno zaba ti nyonso yina États-Unis ke salaka kele na lutangu ya kumi na tatu? Beno zaba ti yawu ke talana na Biblia na Apocalypse 13? Kieleka. Kibulu ya fyoti, mwana ya dimeme yina basikaka na maza, bunene ve mpe bantu mingi, . . . basikaka ve na maza, kasi basikaka na ntoto, kisika ya kele na muntu ve. Yawu vwandaka na mampoka zole ya fyoti: ngolo ya luyalu mpe ngolo ya dibuundu. Mpe yandi vwandaka mwana - dimeme: kimpwanza ya nsambu. Mpe na manima ya mwa ntangu fyoti, bawu kwendaka kintwadi mpe yandi vwandaka zonza mutindu dalago, mpe vwandaka salila ngolo nyonso yina Rome vwandaka sala na ntwala ya yandi. Ya ke na kukwiza na yinsi ya beto. Beno sonika yawu. Beno tala mbote Kuvukana ya Mabuundu mpe Katolika kuvukana kintwadi, mpe beno tala mbote yina ke baka kisika.

¹⁰⁴ Bantu yina ke landa Dikunzi ya Tiya kieleka ke kuzwa ntangu mosi ya mpasi, kasi bawu kele ya kukubama samu na kukituka na ntangu yina, ya kele kieleka, kaka ya kukubama na kukwenda. “Samu ti Mwana - dimeme kunungaka bawu,” me tuba Biblia, “mpe bawu yina vwandaka landa Yandi, samu ti bawu vwandaka ya kubokila ya kusoola mpe ya kukwikama,

Basoolami ya Nzambi.” Mu ke na kuzolaka ve kukota na profesu yango ntangu yayi, samu ti beto kulandila na yayi.

¹⁰⁵ Beno kuwa mbote, kapu ya 7, . . . Mu zola kutuba kapu ya 4, na nzila ya 7. Sambwadi kele lutangu ya kusukisa. Tatu kele lutangu ya Luzingu. Sambwadi kele lutangu ya kusukisa, mpe yayi ke pesa saba ya muvimba.

“Mpe dyaka,” beno bambuka moyo, yandi zonzaka, “Nzambi,” na zulu ya dyambu yayi. Na manima yandi zonzaka na “musiku,” na zulu ya dyambu yayi. Mpe mbala mosi, dyaka, “Yandi zengaka kilumbu,” kilumbu ya tatu, mbala ya tatu.

Mbala mosi dyaka, yandi zengaka kilumbu, kilumbu mosi, na kutubaka na kati ya David, Bubu yayi, na manima ya ntangu mingi; . . . Bubu yayi, na manima ya ntangu mingi; mutindu ya kele ya kutuba, Bubu yayi kana nge kuwa ndinga ya yandi, beno kanga ve ntima. (Beno tala mbote.)

. . . kana Josué pesaka bawu kupema (saba), . . . yandi zolaka zonzila dyaka ve na kilumbu yankaka.

Bilumbu kusobaka na Yesu Klisto: kukatuka musiku na lemvo, katuka bisalu na lemvo, katuka kima mosi beno ke salaka na yina kima mosi Nzambi salaka, na zulu ya mangolo ya beno mosi to na zulu ya mangolo ya Yandi. Nsodolo kusalamaka.

¹⁰⁶ Ntangu Moïse kubasikaka na ntoto ya kuyuma, na musiku, yandi tubaka, “Kusala pite ve. Kuyiba ve. Kufwa muntu ve. Santisa kilumbu ya saba.” Ntangu Yesu basikaka na ntoto ya kuyuma. . . Ntangu Moïse kwizaka, mpeve ya yimbi mekaka yandi. Na ntangu mpeve ya yimbi kumekaka yandi, yandi kulembaka. Moïse vwandaka ya kukondwa ngolo. Bantu yikwa zaba yinki ya vwandaka? Kudasuka. Mpe ntangu yandi kumonaka bawu kusambila mwana ngombe ya wolo, yandi losaka misiku na yisi mpe zengaka yawu, na kulakisa beno ti kinganga zolaka zengana. Mpe Nzambi pesaka dyaka yawu na yandi.

¹⁰⁷ Kasi ntangu Yesu kubasikaka na ntoto ya kuyuma, bilumbu makumi yiya ya kumanga na kudya, Yandi vwandaka na nsatu, kisika kaka ya kukondwa ngolo yina vwandaka na Yandi. Mpe dyabulu kwizaka na Yandi mpe tubaka, “Kana Nge kele Mwana ya Nzambi, kitula matadi yayi na mampa. Sala kimangu awa. Ti mu mona Nge kusala yawu, mpe mu ke kwikila Nge.”

¹⁰⁸ Yesu tubaka, “Ya kele ya kusonama, ‘Muntu ke zinga kaka ve na dimpa, kasi na konso Ndinga yina ke basika na yinwa ya Nzambi.’” Yandi zabaka ti yandi kutanaka ve na Moïse kuna, samu ti Yandi kwendaka na Ndinga.

¹⁰⁹ Yandi nataka Yandi na nsongi, ya tempelo, yandi tubaka, “Kana Nge kele Mwana ya Nzambi, kubwa Nge mosi na yisi.” Mpe yandi me *fika*, me tanga ve, kasi me *fika* Masonuku.

Yandi tubaka, “Ya kele ya kusonika, ‘Yandi ke pesa muswa na Bawanzio, samu ti, dikulu ya Nge kututa ve ditadi. Yandi ke nata Nge.’”

¹¹⁰ Mpe Yesu kwendaka mbala mosi na Ndinga, mpe sembaka yandi.

¹¹¹ Yandi nataka Yandi na zulu ya mongo mpe lakisaka Yandi États-Unis mpe Allemagne mpe Suisse, mpe bayinsi nyonso ya yinza, yina nyonso zolaka vwanda, yandi tubaka, “Ya kele nyonso ya munu. Mu ke sala na yawu nyonso yina mu zola.” Kukondwa ntembe ya kele samu na yina beto kele na bamvita mpe bamambu. Yandi tubaka, “Mu ke sala na yawu...” Kukondwa ntembe ya kele samu na yina bakento ke lwataka... mpe musiku, ke bikaka yawu kuluta. Ya kele nyonso ya kuyala na dyabulu. Ya kele yina Biblia ke tuba. Satana tubaka, “Ya kele ya munu. Mu ke sala na yawu nyonso yina mu zola.” Yandi tubaka, “Kana Nge sambila munu, mu ke sala Nge ntinu mutindu mu kele.”

¹¹² Yesu tubaka, “Ya kele ya kusonika, ‘Nge ke sambila kaka Mfumu Nzambi ya Nge, nge ke sadila Yandi kaka.’ Katuka na ntswala ya Munu, Satana.”

Samu na yinki? Yesu zabaka ti Yandi ke byadila yawu na Millénium yayi ya nene, ntangu Kimfumu ya Yandi ke kwiza. “Ti luzolo ya Nge kusalama na zulu ya ntoto mutindu ya kele na Mazulu.” Kuvwata bakupe ke vwanda dyaka ve. Kunwa ke vwanda dyaka ve. Kulula ke vwanda dyaka ve. Pité ke vwanda dyaka ve. Lufwa ke vwanda dyaka ve. Mipasi ke vwanda dyaka ve. Yandi ke byadila yinsi nyonso. Ya kele ya Yandi. Ya kele kieleka. Ya kele ya Yandi, mpe Yandi ke byadila. Kasi Satana ke na yawu na kati-kati ya mwa ntangu mosi, ya kele bubu yayi, yina beto ke na kuzingila.

¹¹³ “Kasi Yandi zengaka kilumbu, na kutubaka, ‘Bubu yayi, na manima ya ntangu mingi.’ Mpe tubaka, ‘Beno kanga ve ntima ya beno.’”

Samu ti kana Josué zolaka pesaka bawu kupema, . . . yandi zolaka tubila dyaka ve na kilumbu yankaka.

¹¹⁴ Mpangi ya munu ya adventiste, tala Yawu. Paul awa, ke tuba. Mpe Paul ke tuba, na Galates 1:8, kana beno ke na kusonika masonuku, Galates 1:8, “Kana Wanzio katuka Mazulu mpe longa nsangu mosi ya mbote ya mutindu yankaka kukondwa Yayi yina mu me longa, ti yandi vwandaka ya kusinga.” Paul ke tuba, “Kana Yesu zolaka pesa bawu kilumbu ya Kupema . . .”

¹¹⁵ Beno tala, ntangu Yandi me kulumuka na mongo. Yandi me kulumuka kuna. Yandi nungaka dyabulu. Yandi vwandaka ya kukusa, ya kukubama na kisalu ya Yandi. Yandi tubaka, “Beno me kuwa bawu kutuba, bawu ya bilumbu ya ntama, ‘Kufwa muntu ve,’ kasi Mu ke tuba na beno ti muntu nyonso yina kele na nganzi na mpangi ya yandi, kukondwa dyambu, me kufwa

muntu yimeni. Beno me kuwa bawu kutuba, bawu ya bilumbu ya ntama,” bubu yayi, mizitisi ya saba. “Beno me kuwa bawu kutuba, kuna na bilumbu ya ntama na manima, na yisi ya musiku, ‘Kusala ve pité.’” ya fwana vwanda muntu me sala, samu na kubwa. “Kasi Mu ke tuba na beno, ti muntu nyonso yina ke tala kento samu na kulula yandi yandi me sala na yandi dezia pité na kati ya ntima ya yandi.” Mutindu yankaka! Me luta mbala mosi musiku yango ya yiya. Kasi Yandi pesaka bawu Kupema?

116 Beto mona yinki yandi tubaka. “David tubaka, ‘Na manima ya ntangu mingi, ya ke vwanda na Kupema ya kulunga yina ke kwiza.’” Nzambi kupemaka na bisalu ya Yandi, na kilumbu ya sambwadi. Nzambi sakumunaka kilumbu ya saba, mpe pesaka yawu na ba-Juif na ntoto ya kuyuma, na dyambu yayi. Bawu kotaka ve. . . na kati samu na kukondwa lukwikilu, samu ti Ndinga vukanaka ve na lukwikilu. “Mpe mbala mosi dyaka, Yandi zengaka kilumbu mosi, na kutubaka na nzila ya David, ‘Na manima ya ntangu mingi.’”

Bankama ya bamvula na manima David kufwaka, Mwana ya David zolaka vumbuka, ya kele Yesu, “Mpe kana bawu ke kuwa Ndinga ya Munu, bawu kanga ve ntima ya bawu.” Nzambi ke tuba na ntima.

117 Ntangu yayi beno tala mbote, na nzila ya 9 ntangu yayi, samu na beno bayina ke na kutangaka. “Yesu zolaka pesa bawu kupema,” nzila ya 8, “Yandi zolaka. . . kutubila ve na kilumbu yankaka.”

118 Kana ya zolaka vwanda na saba, kana ya zolaka vwanda na kuzitisa ya Lumingu, kuna Yandi zolaka tubila yawu. Kana Yandi tubaka, “Ntangu yayi ya kele dyaka ve na saba, kuzitiza ya kilumbu ya saba kele dyaka ve, yina Mu zola beno kuzitisa kele Lumingu,” Yandi zolaka tuba yawu. Paul tubaka ti Yandi zolaka sala. Yandi zolaka tuba, “Benno nyonso beno sambila na Lumingu. Ya ke vwanda kupema.” Mbote, kana Yandi zolaka ti bawu kuzitisa saba, Yandi zolaka tuba, “Benno landila kaka na kuzitisa kilumbu ya sambwadi. Kasi ntangu yayi Mu zola beno kuzitisa Lumingu, kilumbu ya nana.” Ve. Yandi me tubaka yawu ata mbala mosi ve.

119 Yandi tubaka, “Kana Yesu zolaka pesa bawu kilumbu, Yandi zolaka tubila na yawu ve?”

120 Ntangu yayi na nzila ya 9. Benno yilama.

Na yina ya kele na kupema samu na bantu ya Nzambi, kuzitisa ya saba samu na bantu ya Nzambi.

Samu ti yandi yina me kota na kupema (ya Klisto) ya yandi, yandi mpe me sukisa na bisalu ya yandi, mutindu Nzambi salaka ya yandi, na saba.

121 Benno me mona yawu? Ntangu yayi beto baka mwa Masonuku samu na kuvwandisa yayi. Mbote mingi. Ntangu Nzambi salaka

yinza na bilumbu sambanu, Yandi kupemaka na kilumbu ya sambwadi, mpe ata mbala mosi dyaka salaka. Nkumbu ya Mfumu kusakumuka. Yandi tungaka yinza, me tula luvangulu na zulu, mpe me kwenda kupema; mpe ata mbala mosi dyaka vutukaka, samu na kutunga yinza mosi dyaka. Yandi manisaka bisalu, mpe kwendaka na kupema. Ntangu yayi, na. . . Kuna, na manima ya funda ya bamvula, kuna disumu me kota; na yina Klisto kumonikisaka, Mwana - dimeme kumonikisaka. Ntangu yayi, yayi kupesamaka na ba-Juif mutindu kifwanusu ya Kupema ya kilumbu ya sambwadi.

Ntangu yayi, *yandi zengaka kilumbu yankaka, na kutubaka na kati ya David, . . . na manima ya ntangu mingi, ya kele na kupema yankaka.*

¹²² Ntangu yayi yinki kele Kupema yango? Beno kwenda na munu na Matthieu, na kapu ya 11, mpe na kitini ya nsuka ya kapu ya 11 ya Santu Matthieu. Ya kele ntangu Yesu sukisaka dilongi ya Yandi na mongo, mpe beno ke mona yinki Yandi tubaka.

¹²³ Yandi tubaka, “Muntu nyonso yina ke tala kento, na kulula yandi, me sala dézia pite na yandi na kati ya ntima ya yandi. Muntu nyonso yina me dasuka na mpangi ya yandi, kukondwa dyambu, me kufwa mpangi.” Bima nyonso yayi, mpe Yandi ata mbala mosi ve bakaka musiku yango yayi, ya saba.

¹²⁴ Ntangu yayi Yandi ke na kusukisaka. Mpe Saba kele Nsilulu ya nene ya Nzambi. Ya kele Kupema. Ntangu yayi, awa beno tala mbote awa, ntangu Yandi na manima me tanga bakyese. Awa Yandi me tuba, na nzila ya 27 ya kapu ya 11 ya Santu Matthieu. Kisika, Yandi vwanda longa bakyese na kapu ya 5.

Bima nyonso me pesama na diboko ya munu, na munu na Tata ya munu: mpe muntu ve zaba Mwana, kasi Tata; . . .

Beno me mona, beno lenda zaba ve mosi kukondwa kuzaba yankaka, samu ti Yandi vwandaka Tata yina me monisama pwelele na nzutu.

. . . muntu mpe ve zaba Tata, kana Mwana, . . .

¹²⁵ Ya ke talana mutindu ti bantu zolaka mona Yawu mpe kusala ntembe ve. Ya kieleka. Nzambi kele ve Bantu tatu. Kana Yandi kele Banzambi tatu, kuna beto kele mimpani. Wapi yina kele Nzambi? Bawu, nyonso tatu, kele Nzambi mosi, kele bisalu tatu ya Nzambi mosi. Yandi vwandaka Tata, na nzutu ya Mpeve-Santu, na Dikunzi ya Tiya yina na ntoto ya kuyuma. Yandi vwandaka Mwana, ntangu Yandi sadilaka kisalu ya Bumwana. “Na mwa ntangu fyoti mpe yinza ke mona Munu dyaka ve; Mu ke kwenda. Mu ke kwiza dyaka mpe ke vwanda na beno, mpe na kati ya beno, tii nsuka ya yinza.” Beno me mona? Yandi kele Butata, Bumwana, mpe Mpeve-Santu, mpe. Ya kele nyonso kaka Nzambi mosi yina ke na kusalaka na kati ya bisalu tatu: Butata, Bumwana, Mpeve-Santu. Ata mbala mosi ve. . .

Ntete ya Jean 5:7 ke tuba, “Ya kele na tatu na Mazulu ke pesaka kimbangi: Tata, Mwana, Mpeve-Santu. Nyonso tatu yayi kele Mosi.”

¹²⁶ Thomas tubaka na Yandi, “Mfumu, lakisa beto Tata.” Ya ke sepedisa yandi.

¹²⁷ Yandi tubaka, “Mu me vwanda ntangu mingi na beno, mpe nge me zaba ve Munu?” Yandi tubaka, “Ntangu nge me mona Munu, nge me mona Tata. Mpe samu na yinki kutuba, ‘Lakisa beto Tata?’”

¹²⁸ Ntangu yayi, ba-unitaire me baka yawu, nkonga ya bantu ya ba-unitaire, mpe me meka na kusala Tata, Mwana, mpe Mpeve-Santu, kaka kisalu mosi mpe kisika mosi, mpe mutindu musapi ya beno, mosi. Ya kele foti. Nzambi zolaka ve. . . Yesu zolaka vwanda tata ya Yandi Mosi ve. Kana Yandi vwandaka, kuna Yandi zolaka vwanda. . . Mbote, wapi mutindu Yandi zolaka vwanda tata ya Yandi Mosi?

¹²⁹ Mpe kana Nzambi kele muntu, ya kukabuka na Mpeve-Santu, Yandi zolaka kuzwa batata zole. Samu ti Biblia ke tuba, ti, “Mpeve-Santu kufukaka Marie mpe yandi kuzwaka kivumu.” Mpe Biblia ke tuba, na Matthieu 1:18, ti, “kima yina vwandaka na kivumu ya yandi kele ya Mpeve-Santu.” Na yina nani kele tata ya Yandi, Mpeve-Santu to Nzambi? Nyonso zole, Mpeve mosi, kana ve Yandi zolaka kuzwa mbutukulu ya makangu na nzila ya bampeve zole.

Ya kele dogme ya Katolika, mpe ata mbala mosi ve ti ya me vwandaka malongi ya biblia. Martin Luther basikaka na yawu, na bima mingi yankaka ya Katolika yina kele na dibuundu ya Luther. Wesley kulandilaka na yawu. Mpe ya ke na kulandila dyaka, kasi ya kele foti. Ya kele Kieleka ve. Ata mbala mosi ve ti ya vwandaka, ata mbala mosi ve ti ya vwandaka Malongi ya biblia. Ata mbala mosi ve ti ya vwandaka musiku na Biblia, na kulonga Banzambi tatu.

Ya kele na Nzambi mosi. Yesu tubaka, “Kuwa, O Israël, Mu kele Mfumu Nzambi ya nge, Nzambi mosi,” Banzambi tatu ve.

¹³⁰ Na Afrika, bawu ke botikaka mbala mosi samu na Tata, mbala mosi samu na Mwana, mpe mbala mosi samu na Mpeve-Santu. Mpe kuna Juif ya mawa ke kwiza, ke tuba, “Nani ya bawu kele Nzambi ya beno? Nani kele, Tata, Mwana, to Mpeve-Santu?” Bawu nyonso, tatu kele, Mosi. Biblia ke tuba ti bawu kele Mosi.

¹³¹ Yesu vwandaka yinzo yina Nzambi vwandaka zingila. Biblia ke tuba ti—ti, na Ntete ya Timothée 3:16, “Kukondwa *kumanga*,” (ya kele, “muntu nyonso lenda ndima”) “nene kele dinsweki ya kinzambi. Samu ti Nzambi kotalanaka na nzutu, na kumonanaka na Bawanzio, yambaka. . . longaka, kwikilaka, mpe zangukaka na Nkembo.” Nzambi. Biblia ke tuba, “Nkumbu ya Yandi ke vwanda *Emmanuel*, yina zola kutuba, ‘Nzambi na

beto.” Biblia ke tuba, ti, “Yesu, na kati ya Yandi kuzingaka kifuluka ya Bunzambi na nzutu.”

¹³² Mutindu beto talaka yawu nkokila yankaka yina: Nzambi, na mbandukulu, vwandaka Mpeve. Mpe kuna, na Nzambi, basikaka Logos, to théophanie, yina vwandaka na nzutu ya muntu, yina ba vwanda bokila Mwana ya Nzambi, samu na kulakisa ya ntuala. Yandi kwizaka na ntoto, na nzutu ya nsuni, mpe ntete Yandi kwiza na kati ya Yesu klisto. Ntangu yayi beno mina yawu mbala mosi, mpangi. Mu ke talisa yawu na beno.

¹³³ Ntangu—ntangu Moïse monaka Yandi. Yandi tubaka, “Bika munu kumona nzutu ya Nge, Mfumu.” Mpe Nzambi bumbaka yandi na Ditadi. Mpe ntangu Yandi lutaka, yandi tubaka, “Ya vwandaka manima ya muntu.” Yina vwandaka théophanie yango. Ya kele kieleka.

Na manima, Théophanie yango zolaka kuma nsuni. Ve Muntu yankaka, kasi Muntu kaka yina zolaka kuma nsuni, samu na kukatula ntunga ya lufwa.

Mutindu nyosi ntangu yandi ke tsokotaka, ya ke bikaka ntunga. Mpe ata mbala mosi ve ti yandi ke bikaka ti... Yandi lenda tula ntunga na nsuni ya muntu samu ti ya kele disumu. Kasi, mpangi, ntangu yandi tsokotaka nsuni yango ya Emmanuel, yandi zimbisaka ntunga ya yandi. Yinga, tata. Yandi lenda sala makelele kasi yandi kele dyaka ve na ntunga.

¹³⁴ Ata ntembe ve ti, Paul, ntangu ba zolaka zenga yandi yintu, tubaka, “O lufwa, wapi kisika kele ntunga ya nge? Nge lenda sala makelele mpe kubaluka mutindu nge zola. Ndyamu, wapi kisika kele lunungu ya nge? Kasi matondo na Nzambi yina me pesa beto lunungu na nzila ya Yesu Klisto.” Beno bawu yayi.

Ya lombaka Nzambi Yandi mosi na kusala yawu. Yandi kwizaka mpe monisamaka na nzutu. Yandi vutukaka na Kimpeve.

¹³⁵ Beno ke tuba, “Mpangi Branham, nge me tubaka ntete ve, na beto, ntangu Nzambi kumaka nsuni ntete Yandi kwiza na kati ya Klisto.”

Ntangu Abraham vwandaka ya kuvwanda na yisi ya tenta ya yandi, kilumbu mosi, kuna me kwiza Bawanzio zole mpe Nzambi, na nzutu ya muntu, me kwiza na yandi. Bawu vwandaka na fundu-fundu na bilele ya bawu mpe vwandaka ya kulemba, mpe bawu vwandaka me vwanda. Mpe Abraham kubasikaka mpe bakaka mwana ya ngombe na mama ya ngombe, mpe kufwaka yawu. Mpe salaka mwa ba-côtelette ya mwana-dimeme. Basikaka mpe kuzwaka...me lomba na Sarah na kubaka mwa faline ya masangu mpe kuyengisa yawu, mpe kusala mwa ba-galette ya masangu. Mpe kuzwaka mwa manteka na ngombe ya kento mpe kuzwaka babeurre. Mpe me nata yawu kuna mpe me tula yawu na yisi, mpe Nzambi kudiyaka yawu.

136 Alleluia! Ya kele samu na yina, “Lukwikilu ya munu ke talaka na Nge, Nge Mwana-dimeme ya Calvaire.”

137 Beno banza ti ya kele kima ya nene samu na Nzambi? Nzambi, Yandi yina salaka potasse mpe calcium nyonso, mpe nyonso na yinza, Yandi kulumukaka na kutala Abraham. Yandi tubaka, “Nge banza ti Mu ke bumba yawu na nge, na kumonaka ti nge kele kibyadi ya yinza?” Amen. “Mu ke bumba yawu ve na nge.” Nzambi bakaka kaka . . .

138 Beto kele ya kusala na bima kumi na sambanu. Yandi bakaka kaka mwa potasse, mpe mwa calcium, mwa pitiloyi, nsemo ya yinza, “Fiu!” “Kota na kati ya yawu, Gabriel,” nzutu!

139 “Fiu!” “Kota na kati ya yawu, Absinthe.” Yandi kotaka na kati ya yawu.

Bawanzio zole, me katuka na Mazulu!

140 Nzambi me tandula diboko mpe me kuzwa ndambu ya yawu, “Fiu” me kota na kati ya yawu, Yandi mosi. Me kulumuka, mpe vwandaka na nsatu. Ya kusakumuna . . . Wapi mutindu samu na yina, nkundi ya Adventiste yina lenda ve kudyanya ngombe? Beto ke kota na yawu, na manima ya mwa ntangu fyoti. Nzambi ya Ngolo nyonso, Yehowa, beno mona kana Nkumbu mosi yina ve kele yina ba bangulaka kaka Yandi na lulaka ya tiya! Alleluia!

Mpe ntangu Yandi vwandaka na zulu ya ntoto, Yandi tubaka, “Ntete Abraham kuvwanda, MU KELE, Yandi yina kaka na divunda ya tiya.” Ya kele kieleka, Elohim, beno mona kana ya kele ve mutindu mosi. Yandi vwandaka Yandi yina vwandaka na divunda ya tiya.

141 Yandi vwandaka Yandi yina awa na ntwala ya Abraham, na nzutu ya nsuni, yina kudyaka mwana ya ngombe, mpe kunwaka miliki ya ngombe ya kento, mpe kudyaka manteka na ba-galette ya mansangu. Nkumbu ya Santu ya Nzambi ya kusakumuka! Me kulumuka kuna mpe tubaka, “Mu ke kwenda ve . . .”

Mpe Yandi vwandaka na mukongo ya Yandi ya kubaluka. Yandi tubaka, “Abraham, Mu ke kwiza tala nge, mpe nge ke kuzwa mwana yango. Nge kele na nkama ya bamvula ntangu yayi, mpe Sara kele na makumi yivwa.” Mpe Sara, na kati ya tenta, me sala, “Ha!” me seka. Yandi me tuba, “Yinki me sala Sara kuseka?” Na manima ya Yandi; tenta na kati-kati ya bawu.

142 Abraham me tuba, “Sara, nge me seka?”

143 “Ve, mu ata mbala mosi ve.”

144 Yandi me tuba, “Yinga, nge me sala yawu.” Wapi mutindu ya télépathie ya kele? Wapi mutindu ya kutanga mabanza ya kele?

Yandi ke salaka mutindu mosi bubu yayi. Yandi kele Yehowa-yile, Yehowa-rapha, mutindu mosi mazono, bubu yayi, mpe kukonda nsuka. Yandi ata mbala mosi ve me kondwaka.

145 Beno tala Yandi. Kuna Yandi me vwanda. Yandi me belama mpe me zonza na Abraham; mpe me zimbana, na meso ya yandi. Mpe tata ya nene Abraham tubaka ti yandi “zonzaka na Nzambi kizizi na kizizi, Elohim,” Nzambi mosi. Beno me bakula yawu? Ve Bantu tatu, mpangi. Bisalu tatu ya Persona mosi!

146 Na mbandukulu vwandaka mosi, Yandi vwandaka Mpeve ya nene yango, Yinto ya maza kisika ya makieleka nyonso, ya zola nyonso, ya ngemba nyonso. Nyonso yina vwandaka ya kuvedila vwandaka na kati ya Yinto ya maza yayi. Ya bandaka na kifwani ya nzutu, théophanie, mutindu ya nzutu yina beto ke kotila. Ve nzutu ya nkembo, kasi mutindu, nzutu ya bawanzio; yina ke na kinsinsya, nzutu.

147 Konso ntangu mu ke mona yinti, mu ke banza, “Yinti yina kele negatif. Ya kele na positif kisika mosi.” Yinti yina ba salaka yawu na nzila ya kima mosi. Mayela mosi salaka yawu. Mpe nyonso ntoto yayi ke salaka ke lakisaka ya Mazulu. Biblia me tuba mutindu yina. Mpe kana ya kele na yinti mosi awa yina fwana kubeba, ya kele na mosi na Nkembo yina ke beba ve.

148 Kana mu mona bakala mosi, mu mona mwa bazolani ya bantwenya, bakala mpe kento ya yandi, kutambula na bala-bala, bayina me zolana kintwadi, yinki ya ke lakisa? Nkumbu ya Mfumu kusakumuka! Ya kele na mosi na Mazulu yina ke beba ata mbala mosi ve. “Kana tabernacle yayi ya ntoto kubeba, beto kele na mosi yimeni yina ke na kuingila,” théophanie.

149 Na yina beno ke na kubakula butatu: Mpeve ya nene, yina ke zinga na kati ya Mwana, Yesu; Yesu ke zinga na kati ya Dibuundu. “Na kilumbu yina, beno ke zaba ti Mu kele na kati ya Tata, Tata na kati ya Munu, mpe Munu na kati ya beno.” [Kisika ya mpamba na bande—Mu.] Nyonso yina Nzambi vwandaka, Yandi me tsyamuna na kati ya Yesu; nyonso yina Yesu vwandaka, Yandi me tsyamuna na kati ya Dibuundu. Beno bawu yayi. “Munu na kati ya Tata, Tata na kati ya Munu; Munu na kati ya beno, mpe beno na kati ya Munu.” Ya kele—ya kele Nzutu.

150 Ya kele yina kele dyambu na dibuundu. Ba me longa bawu mwa malongi ya ntama ya mpamba ya boma, ya mama ya kukula ya mwa mutindu, kubasika mpe kukabula ya basupu ya nkokila mpe kubula bansaka ya bakalati. Kukondwa ntembe ti beto me kuzwa poto-poto mingi ti beto me kuzwaka. Beto ke na nsatu ve ya bandandani ya bana mpe mwa kukabula ya basupu ya nkokila. Yina beto ke na nsatu kele Nsangu ya mbote ya ntama ya ngolo, mpe bantu ya lukwikilu na mbele ya kuyilama kuna, mpe yina ke telemina. Yina beto ke na nsatu bubu yayi, ya kele ve mwa théologie ya mpamba mpe mwa théorie yina mwa nkonga ya bantu me sala. Beto ke na nsatu ya Nsangu ya mbote ya ngolo yina ba me longa na Nsemo mpe Ngolo mpe kumonisama ya Mpeve-Santu.

151 Beno tala awa ntangu yayi.

Mutindu yandi tubaka, *yandi zengaka kilumbu yankaka, na kutubaka na David, . . .*

. . . kana Josué zolaka pesaka bawu kupema, . . . yandi zolaka tubila . . . ve na kilumbu yankaka.

Kasi . . . ya kele na kupema samu na bantu ya Nzambi.

Samu ti yandi yina me kota na kupema ya yandi, . . . me sukisa na bisalu ya yandi, mutindu Nzambi salaka ya yandi.

152 Ntangu yayi wapi kisika beto ke tanga? Matthieu, makumi zole- . . . kapu ya 11, nzila ya 27.

Nyonso yina Tata me pesa na munu, me pesama na munu na Tata ya munu, na kisika: mpe muntu ve zaba Mwana, kasi Tata; (Mbote mingi.) muntu mpe ve zaba Tata, kana Mwana, mpe yandi na yina yandi Mwana ke zola kumonikisa yandi.

153 Beno me mona, ya kele ve bambala beno ke longoka, bambala yikwa évêque ke zola ti beno kuzaba. Ya kele bambala yina Nzambi zola beno kuzaba. Kana beno lenda ve kumona Luzayikisu yayi, beno yufula ve évêque. Beno yufula Nzambi. Beno yufula ve pasteur ya beno. Beno yufula Nzambi. “Mwana ke monikisaka Yandi,” *Yandi*, kiyingilu kimuntu.

154 Beno kuwa. Yayi ke sala beno mpasi. Beno tala musiku. Paul tubaka, “Kana Yandi bikaka kilumbu yankaka, Yandi zolaka tubila yawu.” Kasi awa kele yina Yandi tubaka.

Beno kwiza na munu, beno nyonso yina me lemba mpe ya bizitu ya kilo ya nene, mpe mu ke pesa beno saba, kupema.

Beno baka kizitu ya munu na zulu ya nge, mpe beno longoka na munu; samu ti mu kele ya kulembama mpe ya kukuluka na ntima: mpe beno ke tala saba samu na moyo ya beno.

Samu ti kizitu ya munu kele ngolo ve, mpe bizitu ya munu kele kilo mingi ve.

155 Beno tala mbote yina Paul tubaka.

. . . kana Josué zolaka pesaka bawu kupema, . . . yandi zolaka tubila dyaka ve na kilumbu yankaka.

Kasi yandi zengaka kilumbu . . . , na kutubaka na kati ya David, . . . na manima ya ntangu mingi; . . . ntangu beno kuwa ndinga ya yandi, beno kanga ve ntima.

“Mpe ya kele . . .” Beno kuwa ntangu yayi, nzila ya 9.

Na yina ya kele na kupema, saba, samu na bantu ya Nzambi.

Samu ti yandi yina, bakala to kento, me kota na kupema ya yandi. . .

“Beno kwiza na Munu, beno nyonso yina me lemba mpe ya bizitu ya mingi. Mu ke pesa beno kupema.”

. . . me sukisa na bisalu. . . ya yandi, mutindu Nzambi salaka ya yandi.

156 Beno lenda vwanda na bamvula makumi zole. Beno lenda vwanda na bamvula makumi tatu. Beno lenda vwanda na bamvula makumi tanu. Kasi minuti yina beno ke kuwa Ndinga ya Nzambi kukonkota na ntima ya beno, beno kanga ve yawu. Na yina beno kota. . . “Yandi yina ke kuwa Bandinga ya Munu, ke kwikila na Yandi yina fidisaka Munu, kele na Luzingu ya Kukonda nsuka, ya ntangu nyonso, mpe ke luta ata mbala mosi ve na kitumbu kasi me luta lufwa na Luzingu.”

157 “Beno tuba, Mpangi Branham, yinki ke salama?” Beno ke kuzwa Mpeve-Santu. Klisto ke kwiza na kati ya beno. Ya kele kieleka?

158 Beno baka na munu na Ésaïe, kapu ya 28, mpe beto tanga. Ésaïe, kapu ya 28, beno mona yina profete ke tuba samu na yawu. Matthieu. . . 28, kubanda na nzila ya 8. Beno tala dyambu ya mpasi ya bilumbu ya nsuka. Beto ke sukisa na minuti.

Samu ti bamesa nyonso ke vwanda, kele ya kufuluka na bilusu mpe. . . ya kele ve na kisika ya kutsyema.

159 Beno bika munu kutelama minuti. Mutindu Ernie vwandaka tuba nkokila yankaka yina, yandi vwanda tuba na muntu mosi. Ernie Fandler, mpangi yayi awa ya Suisse, yandi tubaka, “Mu telamaka mpe bikaka yawu kukota.”

160 Mu zola ti yayi kukota.

. . . ya kele ve na kisika ya kutsyema.

Samu ti bamesa nyonso ke vwanda, ya kufuluka na biluki. . .

Mpe mutindu *yimbwa* ke kwendaka na yina yandi me *luka. . . mpe mama ya ngulu. . . na poto-poto ya yandi*, mutindu mosi ke salaka bantu yina ke vutukaka manima.

161 Wapi dyambu na beno ba-Méthodiste? Beno vwanda vwandaka na Nsemo. Yinki me salama? Nzambi me baka Yawu na diboko ya beno, Yandi me pesa Yawu na ba-Nazaréen.

Yinki me salama na beno ba-Nazaréen? Beno na ntangu mosi vwandaka na Nsemo. Nzambi bakaka Yawu na maboko ya beno mpe me pesa Yawu na bantu ya Pantekote. Kieleka. Beno dibuundu ya Nzambi mpe bayankaka ya beno bantu ya santu, samu ti beno me manga Nsemo, beno me sala dénomination beno mosi mpe me tuba, “Beto ke kwikila dyaka ve ya kulutila *yayi*,” Nzambi me kwenda mpe me lakisa beno ti Yandi vwandaka na bantu yina zolaka landa Yandi.

162 Yinki me salama na beno bantu ya Pantekote? Beno kuzwaka Nsemo. Nzambi me katula Yawu na beno.

Dikunzi ya Tiya ke na kulandaka nzila. Konso ntangu yina Dikunzi ya Tiya ke kwenda, Dibuundu vwandaka kwenda na Yawu.

Mpe ntangu Luther kubongisaka, na ngaanda ya dibuundu ya Katolika, dibuundu ya yandi, Dikunzi ya Tiya kukwendaka mpe Wesley kwendaka na Yawu.

Wesley kubongisaka mpe salaka dénomination ya yandi, mpe Dikunzi ya Tiya kukwendaka mpe ba-Nazaréen kwendaka na Yawu.

Ba-Nazaréen kubongisaka, mpe dibuundu ya Nzambi kukwendaka na Yawu; mpe tubaka ti bawu vwandaka ve dénomination, kasi bawu vwandaka.

163 Na manima yinki kusalamaka? Kima yina landaka, bantu ya Pantekote kumonaka Tiya, mpe bawu me landa. Mpe yinki beno me sala? Beno me sala malongi na bandinga, mpe me bongisa yawu, “Muntu nyonso fwana kuzonza na bandinga ntete bawu kuzwa Mpeve-Santu,” na yina Nzambi mbala mosi me katuka mpe me bika beno ya kuvwanda kisika beno kele.

164 Yinki me salama na beno ba-Unitaire? Beno me mona mbotika, na Nkumbu ya Yesu. Beno me sala malongi na yawu, mpe me kabuka beno mosi na bayankaka ya Yawu, mpe Nzambi mbala mosi me katuka mpe me bika beno ya kuvwanda kuna. Kieleka.

165 Yinki me salama na beno ba-Assemblée de Dieu, Conseil ya Nene ya ntama? Beno me sala organisation beno na beno, mpe Nzambi mbala mosi me kwenda mpe me bika beno kuna. Mpe ntangu yayi beno kele kima ve kasi nkonga ya madidi, ya misiku mutindu bayankaka ya bawu kele.

Mpe Dikunzi ya Tiya ke na kukwenda na ntwala. Alleluia!

. . . bamesa nyonso kele ya kufuluka na biluki . . .

166 Beno tala na Madia ya Mfumu. Beno tala, bawu mpe . . . Mu vwandaka kisika bawu ke bakaka dimpa ya bilumbu nyonso. Mpe dimpa yango zolaka vwanda ya kusala kukondwa levule. Mpe bawu ke pesa yawu na misumuki, bantu yina ke kunwaka tabaka, bakento ya kindumba, bakento ya kindumba, ntangu nyonso yina bankumbu ya bawu kele na buku.

167 Mpe beno ba-Baptiste ke bokilaka yawu kominyo ya “kukangama.” Ntangu yayi, beno ba-Baptiste ke salaka mwa makelele, Nzambi ke katula beno mpungi ya beno. Ya kele kaka kieleka, beno ke lenda dyaka ve na kubula yawu. Kominyo ya “Kukangama”, beno ke kabuka beno mosi, na kutuba ti mu kele ya santu kulutila nge.

Beno bambuka moyo, yayi kele tabernacle ya ba-Baptiste. Ya kele yina beno ke kuzwa, beno me bongisa beno na beno. “Oh,” beno ke tuba, “beto kele ve organisation.” Yinga, beno kele yawu. Kieleka, beno kele. Beno ke tuba, “Beto kele kimvuka ya bumpangi.” Yinga, samu na muntu nyonso yina ke kota na kielo mpe ke longa kaka mutindu beno ke kwikila yawu, ya kele nyonso ya kulunga. Kasi, yankaka, beno—beno ke losa yandi ve na ngaanda, kasi beno ke basisa yandi na kimvuka ya beno. Ya kele kaka kieleka. Oh, beno ke na mutindu ya kusala yawu. Mutindu mosi Nzambi kele na mutindu ya kusala yawu. Kasi Dibuundu ya Nzambi ke landila na nzila. Dikunzi ya Tiya ke ndima ve mutindu yina.

. . . bamesa nyonso kele ya kufuluka na biluki . . .

¹⁶⁸ Ntangu yayi beno kuwa. Awa yayi ke nyongisa beno mwa ntangu fyoti. Beno kuwa. Mu ke tanga Ndinga. Yayi vwandaka nani? Profete, Ésaïe.

. . . bamesa nyonso kele ya kufuluka na biluki . . . na yawu ya kele na kima ve ya bukente, kaka mutindu yimbwa ke kudyaka yimbwa.

¹⁶⁹ Beto ke kwiza na dibuundu: bakento ke zenga, ke zenga nkufi nsuki ya bawu, ke lwata bakupe, ke basika mpe ke mona babakala kukulumuka bala-bala; bawu ke kwenda zenga matiti na ngaanda ya lupangu, bantwenya ya bakento ke zola kuwa muntu kubula mpyololo ya buledogue to ya yingo, ata nyonso yina ya kele, beno zaba, “Fiu-fiu!” Oh, beno ke banza ti beno kele kitoko, mutindu yina ve?

¹⁷⁰ Mpe beno babakala ke tambula bala-bala, na cigare na yinwa ya beno, mpe diakre na kimvuka. Beno ke talana mutindu ngombe ya Texas yina ba me zenga mampoka. Mpe kuna beno ke banza ti beno kele muntu ya nene. Ya kele kaka kieleka. Kukondwa ntembe ti bamesa nyonso . . . Beno ke belama mpe ke baka kominyo, mpe ke sala mutindu beno kele muntu ya nene, mpe beno ke vuna mpe ke yiba mpe ke vuna, sabala nyonso. Wapi dyambu na beno?

. . . bamesa nyonso kele ya kufuluka na biluki . . .

¹⁷¹ “Oh, mu ke bakaka Madia ya Mfumu. Kieleka, beto ke salaka yawu na dibuundu ya beto. Yesu tubaka ti Yandi ke vumbula beto na bilumbu ya nsuka kana beto baka Madia ya Mfumu.”

¹⁷² Kasi, “Yandi yina ke kudyu mpe ke kunwa na mutindu ya kulunga ve, ke kudyu mpe kunwa kitumbu samu na yandi mosi, na kubakulaka ve Nzutu ya Mfumu. Samu na yina na kati ya beno bambevo kele mingi mpe bantu ya banzutu ya kulemba, mpe ti mingi me kufwa,” mabuundu ya ntama, ya kufwa, ya misiku. Mpeve ya Nzambi me basika na beno. Dikunzi ya Tiya kele dyaka ve kuna. Beno ke manga kubeluka ya Kinzambi. Beno ke manga mvumbukulu.

173 “Oh,” beno ke tuba, “oh, Yandi vumbukaka na lufwa, na disolo.” Mbote, wapi mutindu samu na Yandi na kuvwandaka mutindu mosi bubu yayi, kana Yandi kuvumbukaka na lufwa? Beno ke tuba, “Oh, ya kele kieleka ve.” Ntangu yayi, beno bawu yayi. Beno ke kuzwa mvumbukulu mutindu beno zola yawu, mpe Nzambi ke na yawu na mutindu Yandi zola yawu.

174 Kasi, kima ya yawu kele, Biblia ke tuba, yina beto zaba kele Kieleka, ti Yandi ke siamisa Ndinga. “Mpe bima yayi yina Mu ke sala beno mpe ke sala. Mpe Mu ke vwanda na beno ntangu nyonso, tii nsuka ya yinza.” “Yesu Klisto mutindu mosi mazono, bubu yayi, mpe kukonda nsuka.” Ya kele yina Ndinga ke tuba.

175 Ntangu yayi yinki kele saba?

. . . bamesa nyonso kele ya kufuluka na biluki . . . ve mosi ya kutsyema.

Na nani *yandi ke longisa luzabu?*

Luzabu ya mutindu ya yinza ve; luzabu ya kimpeve!

Nani yandi ke longisa luzabu? . . . na nani Yandi ke sala . . . kubakula malongi?

176 “Oh, nkembo na Nzambi, organisation ya beto ke kwikilaka ve Yayi. Bawu ke pesa ve muswa na Yina.” . . . kipe ve yina organisation ya beno ke kwikilaka. Yinki Ndinga ya Nzambi ke tuba samu na yawu? “Oh, mbote, ba-pasteur ya beto, beno zaba, me longokaka.” Oh, kieleka. Kieleka, bawu kuzwaka ndongosolo mingi ti, bawu me tula Nzambi na ngaanda ya yawu. Kieleka, na yina beno lenda tuba na bawu Ndinga mpe bawu ke baluka mpe ke tuba, “Mbote, mu ke kwikila kaka Yawu ve mutindu yina.” Oh, beno kima ya boma! Beno bika mu tuba na beno.

177 Beno tala awa.

. . . na nani Yandi ke sala . . . kubakula malongi? bayina me bika dibene, mpe . . . bayina me bika miliki, mpe bayina me bika mabene.

178 Kilumbu yankaka yina, mfinangani ya munu kwizaka. Yandi tubaka, “Billy, pasteur mosi awa na mbanza, mwa muntu ya kulutila luzolo yina nge me monaka ntete ve. . .” Yandi tubaka, “Kento ya munu mpe munu vwandaka ya kuvwanda na bapayjama ya beto, pene ya kati-kati ya mpimpa, mpe mwa pasteur yina me kwiza mpe yandi—yandi—yandi kunwaka mwa café na beto mpe yandi kwendaka na bayinzo ya bamfinangani yankaka, mpe yandi pesaka bawu maboko. Bawu vwanda kuzwa mwa nsaka ya bakalati, mpe yandi vwandaka mpe bulaka bakalati na bawu.” Yandi tubaka, “Oh, yandi vwandaka mwa muntu ya kulutila kintwadi yina nge me monaka ntete ve.” Yandi tubaka, “Oh, beto zola yandi. Beto ke zola ve kukabuka na yandi samu na kima mosi ve.”

179 Mu telamaka kuna mwa ntangu fyoti, mu banzaka, “Mbote?”

180 Yandi tubaka, “Oh, nge banza ve ti konso dibuundu ke vwanda na nsatu ya muntu mutindu yina?” Huh! Mu lendaka ve kupesa mvutu na yawu. Yandi tubaka, “Na mwa kisika yankaka,” yandi tubaka, “bawu vwandaka na kisika mosi ya kitoko. Mulongi yayi mpe kento ya yandi, bantu ya luzolo, kuna bawu me kota na kukipe bana tii bawu kuzwaka lukolo ya Biblia.” Mpe yandi tubaka, “Bawu kuzwaka kaka bawu mingi, ti kima kufulukaka kaka na bana ya fyoti.” Yandi tubaka, “Oh, yandi lenda tuba mitindu nyonso ya mwa masolo na bana ya fyoti.”

181 Mu tubaka, “Ya kele mbote. Ya kele kieleka mbote.”

182 Mu me vutuka. Mu vwanda me katuka kaka na Canada. Mu banzaka, “Munu yandi yayi. Oh! Bantu. . . Wapi dyambu na munu? Mu ke salaka yawu ve.” Mu me kwenda sukula ditoma ya munu. Mu me banza, “Nzambi, mu ke na kukuma kiboba, mpe munu yandi yayi. Mu me nwana. Mu me dila. Mu me bondila. Mpe nyonso yina me kuzwa kele luvwenzo ya nene.”

183 Nyonso, ti muntu tuba kima ya yimbi samu na beno, “Oh, exalté ya kiboba,” kima mutindu yina.

184 Mu vwanda banza na yawu. Mpe Ndinga mosi kwizaka na munu, tubaka, “Bantu yina ya kele mbote mingi kana bawu ke na kusalaka yawu, kasi ata mbala mosi ve ti Mu me bokilaka nge samu na kusala yawu. Mu bokilaka nge samu na kubaka Mbele mpe kutelama kuna mutindu Josué mpe kutelemina, mpangi. Kulutisa ve ntangu na mwa kimvuka to mwa organistion ya dibuundu, kasi telemina dyabulu. Telama na ntwala, bokila kieleka kieleka, mpe yimbi yimbi. Longa Ndinga mpe tala yina kele na lukwikilu ya kukwikila Yawu. Kwenda tuba kuna.”

185 Mu me banda na kusala na mbangu ditoma yango, na kusukulaka, ntangu nyonso. Mu vwanda tuba, “Matondo, Mfumu. Matondo, Mfumu.” Na manima mu kuwaka mbote. “Ya kele mbote mingi, Mfumu, mu ke simba yawu mwa ngolo dyaka, mpe mu zola kufwa na Yawu na diboko.”

. . . na nani mu *ke sala* kuzaba *malongi?* (Beno kuwa.)

. . . *bamesa kele ya kufuluka na biluki*. . .

. . . *bayina me bika miliki, mpe me bika mabene.*

Ntangu yayi beno tala mbote.

Samu ti musiku mutindu na yina na zulu—na zulu ya musiku, musiku na zulu ya musiku; . . . nzila na zulu ya nzila; awa fyoti, mpe kuna fyoti:

Samu ti na bikoba yina ke tekita mpe na bandinga yankaka ti mu ke zonzila na bantu yayi.

Ya kele ya kutuba na yandi, Yayi kele saba kisika yina beno ke sala yina me lemba kupema; . . . yayi kele kisika ya kupema: dyaka bawu zolaka ve kuwa.

Samu ti *ndinga ya MFUMU* kukwizaka na bawu (Muntu mosi kulongaka Yawu.) *musiku na zulu ya musiku, . . . na zulu ya musiku; nzila na zulu ya nzila, . . . na zulu ya nzila; awa fyoti, mpe kuna fyoti; ti bawu lenda kwenda, mpe kubwa na manima, mpe kuzengana, mpe kusimba mpe kubakama.*

186 Yinki kele Kupema? Na wapi ntangu Kupema kukwizaka? Ntangu bantu zonzaka na bandinga yankaka mpe vwandaka na bikoba yina ke tekita. Bikoba yina ke tekita; bawu vwanda zonza kima ve. Bawu vwanda tekita. Na wapi ntangu ya salamaka? Na Kilumbu ya Pantekote, ntangu Mpeve-Santu kwizaka. Ya kele Kupema: Mpeve-Santu. Yesu tubaka, “Beno kwiza na Munu, beno nyonso yina me lemba mpe ya bizitu ya mingi, mpe Mu ke pesa beno Kupema. Mu ke pesa beno Luzingu, Luzingu ya Kukonda nsuka,” *Zoe*, Luzingu ya yandi mosi Nzambi. Nzambi ke kwiza na kati ya beno mpe ke vwanda kitini ya beno. Yandi ke pesa beno mbutukulu mpe ke sala beno mwana ya bakala mpe mwana ya kento.

187 Ntangu yayi beno tala mbote. Yina vwandaka kupema ya tatu Yandi kupesaka. Ya ntete: Nzambi kuzwaka yawu, na kusalu ya Yandi. Ya zole: Israël kuzwaka yawu, na musiku. Ya tatu: Dibuundu kuzwaka Yawu, mutindu kitini ya Nzambi.

188 Tatu kele lutangu ya luzingu. Bantu yikwa zaba yawu? Konso ntangu beno ke mona tatu, ya kele luzingu. Beno tala, ntangu Nzambi kuvangaka ntoto, na kilumbu ya tatu vwandaka luzingu. Bantu yikwa zaba yawu? Kilumbu ya tatu. Kuna kwizaka luzingu na kilumbu ya tatu ya luvangulu.

Butatu: Tata vwandaka na zulu ya bantu, na Dikunzi ya Tiya; Mwana vwandaka Muntu, Yandi yina zonzaka na bantu mpe salaka bawu kuyilama; Mpeve-Santu vwandaka kitezo ya tatu, yina vwandaka Mpeve-Santu, Nzambi na kati ya bantu. Luzingu! Tata, Mwana . . .

Kupema, ya Nzambi; kupema, ya Israël; mpe Kupema, ya Dibuundu, kuzitisa ya saba.

189 Na yawu, kana beno me kuzwaka ntete ve Mpeve-Santu, ntete, beno me kotaka ntete ve na kati ya Kupema ya Nzambi. Beno fwana tuba ve, “Oh, mu lenda ve. Mu zola kunwa tabaka. Mu—mu lenda kaka ve kusala yawu; mu kele Muklisto. Kieleka mu zola ve kunwa, kasi mu kele Muklisto. Mu lenda kaka ve, mu zola kunwa ve, kasi mu zola kwandi.”

190 Kana beno ke lula bakento, kana beno ke sala bima nyonso yayi ya yimbi, beno me kuma ntete ve na ntangu yango ya Kupema kwandi. Beno me kotaka ntete ve na kati ya Kupema ya beno.

191 Mpe ntangu beno ke kota na Kupema yayi, beno ke suka na bisalu ya beno ya yinza, mutindu Nzambi salaka ya Yandi. Samu na yinki? Beno kele kitini ya Nzambi. Beno ke pema, ya

Seko. Beno bawu yayi. Ya kele Saba. “Beno kwiza na Munu, beno nyonso yina kele ya kulemba.”

Bubu yayi, *yandi me zengaka kilumbu mosi, . . . na manima ya ntangu mingi, na kati ya David; . . . ntangu beno kuwa ndinga ya yandi, beno kanga ve bantima.*

¹⁹² Kaka mpova mosi to zole dyaka awa ntangu yayi, beto ke manisa.

Samu ti yandi yina me kota na kupema ya Klisto, . . .

Beno kwiza na munu, beno nyonso yina kele ya kulemba mpe . . . bizitu ya kilo mingi . . .

. . . beno me sukisa na bisalu ya beno, mutindu Nzambi salaka ya yandi, na kilumbu ya sambwadi.

Ya beno lenda vwanda na mvula makumi tatu, na mvula makumi yiya, na mvula makumi tanu, ata nyonso yina ya kele. Beno ke sukisa na bisalu ya beno, mutindu Nzambi salaka ya Yandi, na Seko. Beno zola dyaka ve bima ya yinza. Yinza kele ya kufwa samu na beno.

¹⁹³ Ntangu yayi, nzila ya 11 ntangu yayi, beno kuwa mbote.

Na yawu beto fwana kusala ngolo na kukota na kupema yango, (mosi yayi ve, mosi yayi ve, kasi mosi Yayi), samu ti ata muntu kubwa na mutindu ya kukondwa lukwikilu mosi.

¹⁹⁴ Yinki ya kele? Dikunzi ya Tiya kele awa. Wanzio ya Mfumu kele na beto. Yandi ke na kusalaka bima kaka mutindu mosi yina Yandi tubaka ti Yandi zolaka sala. Mpe bantu ke na kupotama na ntoto, ke na kutuba, “Oh, mbote, mu banza ti Yawu kele nyonso ya kulunga. Ya kele kieleka mbote. Oh, mu banza ti Yawu kele ok.” Beno sala keba ti beno kubwa na mutindu mosi ya mutambu ya kukondwa lukwikilu. Beno baka Yawu na ntima ya beno nyonso.

¹⁹⁵ Beno tala mbote.

Samu ti ndinga ya Nzambi (malongi ya dibuundu ve), Samu ti ndinga ya Nzambi kele moyo mingi, ngolo mingi, . . . ya meno kulutila mbele ya meno ya balweka nyonso zole, (beno kuwa), yawu ke kotaka tii . . . na kukabula moyo mpe mpeve, . . . mikwa mpe butonfo ya mikwa, mpe . . . (beno kuwa), mpe kele mufundisi ya mabanza mpe bansatu ya ntima.

Yinki ya vwandaka? Mpeve-Santu lenda kwiza mpe kutuba, “Nge salaka kima *yayi-yayi*. Mpe nge salaka *yayi* mpe salaka *yina*. Nge ke na mutindu *yayi* ya kimbevo, mpe *yina*. Kana nge sungika *yayi*, nge ke sala *yina*.” Beno me mona? Mufundisi ya mabanza.

¹⁹⁶ Mpe bantu ke tuba, “Yinki ya kele? Oh, ya kele télépathie mentale. Oh, ya kele . . . Yandi kele mumoni.” Beno me mona yina

mu zola kutuba? Ya kele yinza ya yimbi, ya ntama ya pité yina zaba ve Nzambi.

197 “Ya kele moyo mingi, ya mabanza mingi, ya ngolo mingi kulutila na mbele ya meno ya balweka nyonso zole, mpe mufundisi ya mabanza mpe bansatu ya ntima.”

Ntangu yayi, yinki ya kele yina zaba bansatu ya ntima? Nzambi. Beno ke tuba, “Mbote, Biblia ke tuba, ‘Ndinga ya Nzambi.’” Ndinga ya Nzambi kele Nzambi.

Na mbatukulu vwandaka Ndinga, . . . Ndinga vwandaka na Nzambi, mpe Ndinga vwandaka Nzambi.

Mpe Ndinga kumaka muntu, mpe zingaka na kati-kati ya beto, . . .

198 Nzambi ke fundisaka mabanza. Abraham vwandaka na mukongo ya yandi ya kubaluka, mpe—mpe mutindu mosi vwandaka Nzambi na mukongo ya Yandi ya kubaluka na tenta. Mpe Sara kusekaka. Mpe Nzambi kubalukaka, tubaka, “Yinki me sala Sara kuseka?” Mufundisi ya mabanza ya ntima! Mu zola ti ya kota mwa fyoti.

199 Na yina ntangu mutindu ya kisalu yina kutelamaka, yina Nzambi silaka na kilumbu ya nsuka, yinki kusalamaka? “Télépathie mentale.”

200 Bawu kubokilaka ve Yandi mosi, Mfumu, “Béelzébul”? Yandi tubaka, “Kana bawu me bokila Mfumu ya yinzo ‘Béelzébul,’ wapi mutindu ya kulutila bawu ke bokila bilandi ya Yandi?”

201 Mu zola beno. Ya ke na kulakisa ti beno zola mingi, samu na beno kivinga fwana vwanda to ve na klime samu beno kwiza kuwa Nsangu ya mbote. Beno kele na nsatu mingi ya kwiza na kisika ya mutindu yayi. Nzambi ata mbala mosi ve ke bika beto kutunga kima kasi yayi. Beto zola yawu mutindu yayi. Ya kele kaka mwa kifwede ya ntama, kasi ya kele mutindu beto zola yawu. Nzambi ke zingaka ve na kati ya yina ke ngengaka. Nzambi ke zingaka na kati ya lembami. Beto zola yawu mutindu yayi. Beto kele na kyese na kukwiza, mpe beno kele, mpe, na kwiza vwanda na kati ya kisika mutindu yayi. Ata mutindu tiya ya kele, ata bambala beno ke toka na kazaka ya beno ya malu-malu, robe ya beno ya malu-malu, yina ke sala ata luswaswanu ve.

Beno ke na kuwa Luzingu ya Kukonda nsuka, Ndinga ya Nzambi yina zaba mabanza ya ntima ya beno. Dikunzi ya Tiya yina vwandaka ya kunamika na zulu ya bana ya Israël, kele ya kunamika awa na nkokila yayi. Mu lenda telemina yawu: ya kele ve na muntu yina lendaka telama awa na yisi ya ngolo ya Mpeve-Santu kukondwa ti Nzambi kutuba nyonso yina me tala yandi mpe kutuba na yandi yina yandi vwandaka. Ya kele kieleka. Beno bawu yayi.

202 Yinki Yawu kele? Yinki Yawu kele? Yawu kele Mpeve mosi yina twadisaka bana ya Israël na kupema ya bawu, mpe bawu kubwaka samu na kukondwa lukwikilu. Beno kubwa ve. Yayi kele siansi ya nsuka. Tata, Mwana, mpe Mpeve-Santu, Luzingu ke luta kuna.

203 Lunungu, Martin Luther, dyaka mutindu ya nsambulu. Kusantisama. . . Martin Luther; John Wesley; mbotika ya Mpeve-Santu, Luzingu. Mvedolo, kele kukwikila; kusantisama, kele kuvedisa; Mpeve-Santu, kele kufuluka, Luzingu. Na nzila ya nsungi ya Luther ve; bawu kuzwaka Yawu na mutindu mosi. Na nzila ya nsungi ya Wesley ve; bawu kuzwaka Yawu na mutindu mosi. Kasi yayi kele nsungi ntangu Mpeve-Santu ke kwiza, Yandi mosi.

204 Mpe kana beno me kuzwaka Yawu ve, wapi mutindu beno, beno lenda kwikila bimangu? Ya ke lomba Nzambi, na kati ya beno, na kukwikila. Beno ke sala mutindu Nzambi. Beno zaba mutindu Nzambi. Beno ke banza mutindu Nzambi. Biblia ke tuba ti beno kele amateur, “banzambi” ya fyoti. Yesu tubaka yawu. Samu ti, beno kele kitini ya Nzambi.

Kaka mutindu mosi mu kele Branham ya fyoti, mpe beno kele yina nyonso beno kele ya fyoti, mpe samu ti bibuti ya beno kele na nkumbu yina. Nkadulu yina kele na beno ya kele samu ti bibuti ya beno kele mutindu yina, samu ti beno kubutamaka na bawu.

Mpe ya kele samu na yina beno ke kwikila Nzambi, mpe ke kwikila na bimangu, mpe bidimbu mpe mambu ya ngitukulu, samu ti beno kele bana ya babakala mpe bana ya bakento ya Nzambi. Beno ke kuzwa Luzingu. Luzingu ke kwizaka na tatu. Mbote mingi.

205 Ntangu Yesu kumataka na mongo, kisika nyonso Yandi kwendaka, Yandi kubakaka Pierre, Jacques, mpe Jean, bambangi tatu. Tatu kele lutangu ya Luzingu. Beno me bakula yawu? Zola, kyese, ngemba.

206 Ntangu yayi, beto kwenda na nswalu awa na nsuka ya kapu, na nswalu, na yina beto ke tanga.

Samu ti ndinga ya Nzambi kele moyo mingi, ngolo mingi. . . kulutila mbele ya meno, . . . mpe swasikisa ata mpe bansatu ya ntima.

Ata kivangu mosi kele ya kubumbama na meso ya yandi: kasi bima nyonso kele. . . ke talanaka na meso ya yandi na ntuala ya yandi beto ke pesa mvutu.

207 Mpangi, ya kele ve na nzinzi yina lenda tentama na zulu ya poto kuna, kukondwa ti Yandi kuzaba yawu ve. “Bima nyonso kele pwelele.” Mpangi, Yandi zaba konso kima yina beno me salaka ntete, konso dibanza yina beno me banzaka ntete. Ya kele yina Yandi kele. Beto ke kwikila Yandi mutindu yina.

Mpe ntangu Nzambi ke kwizaka na kati ya beto, mpe ke vwandisa beto na kati ya Dibuundu, Yandi ke tulaka makabu mpe bima na kati ya Dibuundu, samu na kusala Moyo ya Yandi. Kana Nzambi kele Nzambi yango ya kukondwa nsuka, na yina Yandi ke belusaka bambevo. Yandi lenda vumbula bantu ya kufwa. Yandi lenda vedisa bantu ya bwazi, ke sala bampofu kumona. Yandi lenda pesa ba-vision. Yandi lenda sala mitindu nyonso ya bima yayi, na kusalaka na nzila ya Dibuundu ya Yandi, samu ti ya kele Nzambi na kati ya beno. Beno tala Dibuundu.

²⁰⁸ Wapi mutindu dibuundu yango me kuma Dibuundu, na kukotaka na Yawu? Ve, tata. Na kupesanaka maboko? Ve, tata. Na nzila ya mbotika ya maza? Ve, tata. Na nzila ya kuvwandaka mambele? Ve, tata. Wapi mutindu beno ke kuzwa Yawu? “Samu ti na nzila ya Mpeve mosi beto nyonso kele ya kubotama na kati ya Nzutu mosi.” Beno bawu yayi.

²⁰⁹ Romains 8:1.

Na yawu ya kele dyaka ve na kitumbu . . .

“Ata kitumbu na yinza.” Bawu lenda ve kufunda beno na kima mosi.

ya kele . . .ve na kitumbu na bayina kele na kati ya Klisto Yesu, bayina ke tambulaka ve landila nsuni, kasi landila Mpeve.

²¹⁰ Beno bawu yayi. Ya kele mutindu ya kufundisa Buklisto ya beno. Ya kele mutindu ya kuzaba ti beno me kota na kati ya Kupema yango, yinza ke tungisa beno dyaka ve. Kieleka. Beno ke mona yawu, beno ke kwenda ntama na yawu. Beno kele na kima ya kulutila mbote na kubanza. Beno bawu yayi, “Ata kitumbu ve.” Ya kele mutindu beto ke kotaka na kati ya Nzutu.

²¹¹ Mpe beno kele ya kukeba, “Ntangu nyonso.” Biblia me tuba yawu. Beno tala awa na Hébreux, kapu ya 10. Yandi ke tuba:

Samu ti kisika ya kele na makabu ya bangombe ya babakala mpe munkayulu, *kubambuka* ya disumu vwandaka salama *konso mvula*.

Kasi muntu yayi, . . .na nzila munkayulu mosi . . .

Nkumbu ya Yandi ya santu kusakumuka!

Samu ti na nzila ya munkayulu mosi yandi me nata na kulunga samu na mbala nyonso . . .

²¹² Alleluia! Samu na reveil yina ke na kwiza ve, kasi *ntangu nionso*. “Bima ya ntama me luta; mpe bima nyonso me kuma ya malu-malu.” Beto ke na kutambulaka na kati ya Nsemo, Nsemo ya kitoko. Bandeke ke na kuyimbaka mutindu yankaka.

²¹³ Mu ke na kutalaka, ya kuvwanda awa, mwa munwi-malafu yayi, yina vwandaka bamvula tanu me luta, mu banza. Rosella, ya meso ya kubaluka ya kulemba, yina vwanda tambula babala-bala ya Chicago, ya kukola na malafu, na kukwendaka

tengu-tengu, vwanda kota na konso mutindu ya disumu ti ya vwandaka, ya kukola na malafu mpe nyonso yina yandi lendaka. Mpe nkokila mosi, Mpeve-Santu, yina kele moyo mingi mpe ngolo mingi kulutila mbele ya meno ya balweka nyonso zole, tubaka, “Kento, nge kele kinwa-malafu.” Alleluia! Kana ya kele ve Nzambi mosi yina vwandaka kuna, yina zabaka ti Sara kusekaka na manima ya Yandi, mu zaba ve nani Yandi kele.

²¹⁴ Na kati ya kivinga na mwa kento yankaka. Yandi kwendaka mpe kuzwaka, mpe nataka kuna. Yandi tubaka, “Nge kele muntu ya drogue.” Mutindu Yandi ke fundisaka mabanza ya yintu!

²¹⁵ Mpe milongi ya nene nene ya mutindu yankaka ya kuvwanda kuna, bayina ke mwangisaka nsangu na yinza ya muvimba, na maboko ya bawu ya kufutika, na ba-Tee-shirt, na kubanzaka ti beto kuzabaka bawu ve, mutindu bawu zolaka vwanda na yisi ya lukutakanu mutindu yina mpe ti Nzambi zolaka monikisa ve banani bawu vwandaka. Ya kuvwanda kuna, na kutalanaka mutindu yankaka, mutindu ti bawu vwandaka bantu yankaka. Mpeve-Santu zabaka bayina bawu vwandaka. Mpe bawu vwandaka ya kuvwanda kuna, na kubanzaka, na bantima ya bawu ti Yawu vwandaka télépathie mentale. Bawu zaba ve mingi na yina me tala Nzambi kuluta Hottentot zolaka zaba na yina me tala mpimpa ya Égypte. Ya kele kieleka. Bawu zaba Yawu na mukanda, kasi na Mpeve ve. “Mukanda ke kufwaka, kasi Mpeve ke pesaka Luzingu.” Kaka yina. Dibanza kele yina. “Moyo mingi, ngolo mingi kulutila mbele ya meno ya balweka nyonso zole, Mufundisi ya mabanza ya ntima.”

²¹⁶ Beno kuwa. Beno tala mbote.

Ata kivangu mosi kele ya kubumbama na meso ya yandi: kasi bima nyonso kele pwelele mpe ke talana na ntuala ya meso ya yandi. . . yandi beto ke pesa mvutu.

Na yina na kumonaka ti beto kele na nganga-Nzambi ya ntete. . . (Beno kuwa ntangu yayi; bantu ya kubela.) . . . yina me luta mazulu, Yesu Mwana ya Nzambi, ti beto vwanda ya kukwikama na yina beto ke kundima.

²¹⁷ “Beno vwanda ya kukwikama,” ya zola ve kutuba beno landila kaka na kupesa kimbangi. Kana beno ke zinga luzingu ve, beno kele ve ya kukwikama na yawu; beno ke na kuzingaka na kima ya luvunu. Beno. . . Beno ke sala mbote na kutuba na ngaanda mpe kutuba kaka ti beno kele musumuki mpe beno zimbana yawu. Beno tuba ve Muklisto, mpe kuzinga mutindu yankaka; beno kele ditadi ya disakuba ya kulutila nene yina yinza me kuzwaka ntete ve. Kana beno kele musumuki, ndima yawu mpe, beno kwenda, sungika na Nzambi. Kana beno kele Muklisto, beno vwanda ya kukwikama na yina beno ke tubaka, beno vwanda kuna.

218 Beno tala mbote yayi ntangu yayi. Mu zola kukota na yayi kaka ntete beto kwenda.

Samu ti beto kele ve na nganga-Nzambi ya ntete yina lenda ve kutala kyadi na mambu yina ke lembisaka beto; kasi ba tontaka yandi na mambu nyonso mutindu. . . beto kele, kasi yandi salaka ve disumu.

Beno kuwa.

Na yawu beto kwenda na kivuvu nyonso na kiti ya kimfumu ya lemvo, ti beto lenda kuzwa kyadi, mpe kuzwa lemvo mpe kusadisa na ntangu ya kufwanana.

Nkumbu ya Nzambi kusakumuka!

219 Beno kuwa, Baptiste, Presbytérien, ya Luther. Beno ke pesa munu kyuvu yayi, “Abraham kwikilaka na Nzambi, mpe ba ndimaka yandi mutindu muntu ya ludedomo.” Mu zaba. Ya kele kisika beno ntangu nyonso ke kwendaka. Ya kele kieleka. “Yinki dyaka muntu lenda sala kasi kukwikila Nzambi?” Ya kele kaka kieleka. Ya kele nyonso yina yandi lenda sala. Kasi ntangu Nzambi ke zaba lukwikilu yango, Yandi ke pesa beno Mpeve-Santu.

220 “Ntangu yayi yinki mu ke sala, Mpangi Branham? Mu boka?” Ya kele mfunu ve. “Mu zonza na bandinga?” Ya kele mfunu ve. Beno lenda boka mpe kuzonza na bandinga, nyonso zole, mpe dyaka kuzinga mutindu—mutindu mumpani, mpe kulandila na kulula bakento. Beno lenda landila na kunwa tabaka mpe kunwa, mpe nyonso yankaka. Mu me monaka bantu kuzonza na bandinga, mpe kukwenda mpe kusala mambu ya kulutula mvindu, ya kulutula kukondwa kusungama yina mu me monaka ntete ve. Mu me mona bawu kuboka, mpe kubasisa mansanga ya ngandu, mpe ke yiba nyonso yina ke kubwa bawu na diboko. Mu me mona bawu kutambula, mpe kubaluka, na konso mwana ya kento yina ke tambula na bala-bala. Uh-huh. Yina kele kidimbu ya mbote ti beno me kuzwa Yawu ve. Ya kele kieleka.

221 Kasi, mpangi, ntangu beno me luta lufwa na Luzingu, bima nyonso yina ke kuma ya kufwa, mpe beno kele kivangu ya malumu na kati ya Klisto Yesu. Kana beno mona kima ya yimbi, beno ke sambila samu na yawu, “Nzambi tala kyadi.” Mpe kana beno mona mambu, na kisika ya kukwenda mpe kutonga, mpe na kumeka na kusala yawu nene, beno ke meka na kukwenda na muntu yina mpe kusungika yawu, mpe kuvutula ngemba na nswalu nyonso. Yina kele Mpeve ya Nzambi na kati ya beno.

222 Kana beno sala foti? Beno kele muntu samu na yawu. Kana beno sala foti, beno ke sungika yawu na nswalu nyonso. “Beno bika ve bwisi yila na zulu ya nganzi ya beno.” Ya kele mutindu beno ke zaba ti beno me luta lufwa na Luzingu, beno kele na luzolo, ngemba, kyese, mvibudulu, bumbote, kusalasana, kukanga-ntima. Beto kele na Nganga-Nzambi ya Ntete ya kuvwanda na Mazulu, ya kukubama samu na kulomba na zulu ya

yina beto ke tubaka. Yinki ya kele? Ya kele ntangu Yesu vutukaka na Logos, Dikunzi ya Tiya yina twadisaka bana ya Israël, me vwanda na Ntwala ya banene yayi, yinto ya maza, mukyama ya Bansemu yina me basika, Bampeve sambwadi ya kulunga, Mpeve ya kulunga ya zola.

²²³ Ntangu yayi beno tala mbote. Ya ntete kele luzolo ya *kulunga*, ya kele luzolo ya Nzambi, ya kutsyema mpe ya kukondwa kuvukisa. Yina ke landa, na kukota kuna, kele zola ya *phileo*, ya kele zola yina kele na beno samu na kento ya beno mpe bana ya beno. Yina ke landa, na yisi ya yawu, kele zola ya *mbakusulu*. Yina ke landa kele zola ya *yimbi*. Mpe ke landila kaka na kukulumuka tii ya ke kuma *mvindu*, ke landila kaka na kubeba, na kubeba.

²²⁴ Mpe nyonso yina me kuzwa mbandukulu, kele na nsuka. Mpe nyonso yina ke kufwa, mpe ba ke bambukila yawu ata moyo ve, ata fyoti ve, mpe ke vutuka mbala mosi na kulunga, kilumbu mosi. Mpe mutindu kaka . . . Beno lenda ve kusukisa na yisi awa, na kati-kati ya nzila, mpe kukwenda na *zulu* awa. Beno fwana vwanda nzila nyonso na kati, na kusalaka kivuvu, na kupemaka ya muvimba na kati ya mpulusu yina Yesu Klisto pesaka na beto, na nzila ya lukwikilu.

²²⁵ Ya kele na Mpeve ya kusungama yina ke katuka na Nzambi. Ya kele yinto ya maza, yinto ya maza ya Nzambi. Ya kele kusungama. Yina ke landa kele muntu ke sala “dyambu ya mbote” samu na mfinangani ya yandi. Yina ke landa kele muntu, “beno fwana tala yandi mbote.” Yina ke landa kele muntu, “kele muyibi.” Yina ke landa kele muntu, “kele muntu yina ke fwaka bantu,” kubaka na ngolo na munduki. Beno me mona mutindu ya ke na kubeba, na kukulumukaka? Kasi bima nyonso yayi ke zonga ti ya kieleka kele.

²²⁶ Ya kele yina mu ke tuba. Konso ntangu beno ke mona muntu yina kele. . . Beno ke mona mwa bazolani kutambula na bala-bala, bayina me zolana, ya lenda vwanda ti bawu kele na bamvula makumi nana. Ya ke tuba kaka ti na Mazulu ya kele na bazolani ya bantwenya yina ke monikisa bawu, na Mazulu. “Kana tabernacle ya ntoto yayi kufwa, beto ke na mosi Kuna.”

²²⁷ Kana beno ke mona muntu yina ke vuna, yiba, vuna, beno bambuka kaka moyo, kitini ya yandi ke na kuingilaka na difelo, samu na yandi, kisika ya yandi kisika ba ke kwamisa yandi na Ntwala ya Nzambi mpe Bawanzio ya santu, na tiya mpe soufre. Ba ke kwamisa yandi kuna. Kukondwa nsuka nyonso ve, ba lenda kwamisa yandi ve kukondwa nsuka, ntangu nyonso zola ve kutuba nyonso, samu na ntangu nyonso. Seko kele ya kukondwa nsuka, Seko kele. . . kele na ata mbandukulu to nsuka. Kasi *ntangu nyonso* kele “kati-kati ya ntangu.” Biblia ke tuba, “Ntangu nyonso mpe,” yina ke vukisa bampova, “kukondwa

nsuka.” Jonas tubaka ti yandi vwandaka na kati ya kivumu ya diteli “ntangu nyonso.” Ya kele kati-kati ya ntangu.

²²⁸ Kasi, beno tala, ya kele kaka na Luzingu mosi ya Seko, mpe ya kele Nzambi. Mpe kana ba ke kwamisa beno kukondwa nsuka, mpe ata mbala mosi ve ke lenda kufwa, beno kele na Luzingu ya Kukonda nsuka. Ba lenda ve kukwamisa beno ntangu nyonso. . . Ba lenda kwamisa beno bankama ya mafuku ya bamvula, na Ntwala ya Nzambi mpe ya Bawanzio ya santu, na tiya mpe soufre. Mu zaba ve yinda ya ke vwanda. Kasi ya ke suka na nsuka samu ti ya kuzwaka mbandukulu. Mpe Nzambi yandi mosi kele na Luzingu ya Kukonda nsuka. “Yandi yina ke kuwa Bandinga ya Munu, mpe ke kwikila na Yandi yina me fidisa Munu,” me kuzwa ve luzingu ya *ntangu nionso*, “yandi me kuzwa Luzingu ya Kukonda nsuka.” Luzingu yina me banda, me katuka ve kaka *awa*. Kasi nzila nyonso Kuna, Luzingu ya Kukonda nsuka, *Zoe*, Luzingu ya Yandi mosi Nzambi ke kulumuka mpe ke zinga na kati ya muntu, mpe yandi kele Seko na Nzambi, mpe lenda ve kufwa. Ya kele yina Ndinga ke tuba.

²²⁹ Beno banza kaka na yawu. Ya kele na Baluzingu zole ya Seko? Beno lenda ve kupesa mvutu na yawu, beno lenda? Ya kele na Luzingu mosi ya Seko, mpe ya kele Luzingu ya Nzambi. Mutindu yankaka yayi ya luzingu, ata nyonso yina ya kele, ya kele na nsuka na yawu. Mpe nyonso yina me kuzwa mbandukulu kele na nsuka. Kasi nyonso yina me kuzwa ata mbandukulu ve ke kuzwa nsuka ve. Mpe Nzambi tubaka ti Yandi ke pesa beto Luzingu ya Kukonda nsuka, kukondwa mbandukulu, beto kele kaka ya kusala kitini ya Yandi. Mpe ntangu yayi Luzingu yina kele na kati ya beto, kwizaka ve awa na nzila ya nkadulu ya kimuntu. Yinza pesaka beto mpeve, kasi mpeve yango kufwaka, mpe beto me kuzwa Mpeve ya Nzambi. Nkembo na Nzambi!

²³⁰ Nzambi vwandaka muntu? Kieleka. “Beto sala muntu na kizizi ya Beto Mosi.” Yinki vwandaka Nzambi? Théophanie, nzutu. Mpe kuna ba salaka muntu mutindu yina mpe ba tulaka yandi na nsaba na kuyala. Kasi ya vwandaka ve na muntu samu na kubundula ntoto, na bambakusulu. Na yina Yandi vangaka muntu na fundu-fundu ya ntoto, na luzingu ya kibulu, mpe muntu yango bundulaka ntoto. Mpe muntu kubwaka, na disumu. Kieleka. Mpe Nzambi, Théophanie, me kulumuka mpe kumaka nzutu mpe zingaka na kati-kati ya beto, samu na kukuula muntu.

²³¹ Na yawu ya kele ve na kima mosi beno lenda sala. Beno kele musumuki, na kubanda. Ba butaka beno na kati ya disumu ya nko. Beno me butama na disumu, me kwiza na yinza na kutubaka baluvunu. Beno kubutama awa na yinza yayi na nzila ya kuvukisa banzutu ya tata mpe mama ya beno. Mpe beno kele kaka yimeni ya difelo, mu ke kipe ve yina beno ke sala. Beno lenda ata mbala mosi ve kuvuna, kuyiba; kuzitisa musiku nyonso, mpe nyonso yankaka; mpe beno ke kwenda na difelo,

mutindu ndeke ke vutukaka na yinzo ya yandi. Kasi mutindu kaka yina beno lenda zinga dyaka, ya kele kundima Mpeve-Santu, Luzingu ya Kukonda nsuka ya Nzambi.

²³² Yinki me sala beno yina beno kele? Na mbandukulu, ntangu Mpeve-Santu fukaka ntoto, ya vwandaka na kima ve kasi éruption volcanique. Mwa fololo mosi ya Pake me basika. Nzambi tubaka, “Ya ke talana kitoko. Landila na kufuka.” Bafololo me basika. Matiti me basika. Bayinti me basika. Bandeke me basika na fundu-fundu me pumbuka. Bibulu me basika. Muntu me basika.

²³³ Ntangu yayi, wapi mutindu ya vwandaka ya kusala? Na nzila ya kufuka ya Mpeve-Santu, yina vwandaka nata bisalulu yayi kintwadi, potasse, calcium; na kusala bafololo, na kusala bibulu, na kusala beno.

²³⁴ Mpe ntangu yayi, beno kele na kimpwanza ya kusoola. Nzambi ke fuka dyaka beno, mpe ke tuba, “Beni ke kuwa Ndinga ya Munu? Beni kanga ve ntima ya beno, mutindu na bilumbu ya kumanga kutumama.” Awa Yandi me kulumuka, ke na kulonga Ndinga.

“Nsangu ya mbote yina ba longaka na bawu ve . . . vwandaka ve na lukwikilu na Yawu, na yawu Yawu salaka bawu ata mbote ve.” Bawu kuwaka Yawu, kasi bawu kukwikilaka Yawu ve.

²³⁵ Nzambi kukulumukaka. Yandi lakisaka bawu Dikunzi ya Tiya. Lakisaka na nzila ya profete ya Yandi, bidimbu mpe mambu ya ngitukulu, Yandi vwandaka na yandi. Bawu kwikilaka ve Yawu. Oh, bawu zolaka kumona bimangu. Bawu zolaka kuwa profete. Kasi ntangu nyonso yina bawu kwikilaka Yawu, bawu salaka ve. Baluzingu ya bawu vwandaka siamisama bawu ve.

²³⁶ “Ntangu yayi,” Yandi me tuba, “beno kubwa ve na mutindu mosi yango ya kukondwa lukwikilu.” Samu na kilumbu ya nsuka yayi, na dibuundu ya Bantu ya makanda, Nzambi me monana dyaka; kidimbu mosi, dyambu ya ngitukulu mosi, Dikunzi ya Tiya mosi, ya kusingisa, ya kusiamisama. Ti beto kanga ve bantima ya beto me kubwa ve na mpukumunu yango kuna, ya kukondwa lukwikilu, samu ti beto ke pola na ntoto mpe ya ke vwanda nyonso ya yawu.

²³⁷ Mpe ntangu Mpeve-Santu ke konkota na ntima ya beno, [Mpangi Branham me konkota na zulu ya chaire—Mu.] “Ntama mingi na manima, ntangu beno ke kuwa Ndinga ya Munu, beno kanga ve ntima ya beno.” Yandi ke tuba, “Mwana ya Munu, yayi kele Kieleka.” Beni tala ve na munati nsangu. Beni kuwa Nsangu. Beni kwikila Yawu. “Beni kanga ve ntima ya beno, mutindu na bilumbu ya kusokisa.”

²³⁸ Ntangu yandi ke kuwa Ndinga ya beno, “Beni kanga ve ntima ya beno.” Na yina beno ke tuba, “Yinga, Mfumu, mu ke kwikila.” Kuna beno ke kota na Luzingu, Mpeve-Santu ke kota

na beno. Mpeve ya beno ya ntama ke kufwa, yina vwanda sala beno kulula mpe kuyina, mpe kuvwanda na mayele ya yimbi mpe kimbeni, mpe—mpe kuyina mpe bima nyonso yina, ke kufwa. Mpe beno ke kuma ya kifuluka na zola kyese, ngemba, ke pema. Ata wapi mutindu mipepe ke bula, ya kele nyonso ya kulunga.

Kizundu ya munu kele ya kusimba mbote na kati ya vwale.

Na konso mvula ya ngolo mpe mupepe ya nene, Kizundu ya munu kele ya kusimba na kati ya vwale.

Samu ti na zulu ya Klisto, Ditadi ya ngolo, mu me telama;

Bisika nyonso yankaka kele zyelo ke dyamisa.

²³⁹ Beno bawu yayi. Eddie Perronet, mutindu yandi kusunikaka nkunga yango ya kuzabana. Bantoto nyonso yankaka, ba-dénomination nyonso, ba-credo nyonso, malongi nyonso, ke na kuzimbana. Klisto!

Beno ke tuba, “Mbote, mu zaba Biblia.” Beno ke kuzwa ve Luzingu na kuzabaka Biblia.

“Mu zaba katekisima ya munu.” Beno ke kuzwa ve Luzingu na kuzabaka katekisima ya beno.

“Mbote, mu kele Muklisto.” Beno ke kuzwa ve Luzingu na kundimaka Buklisto.

²⁴⁰ Beno ke kuzwa Luzingu na kuzabaka Yandi. Na kuzabaka Yandi, beno ke kuzwa Luzingu. “Kuna beno ke kota na Kupema ya Yandi. Beno ke sukisa na bisalu ya beno, mutindu Nzambi salaka ya Yandi.” Beno kele ya kusala mwana ya Nzambi, yina ke sala kintwadi na Nzambi. Mpe kana ti—kana ti Mpeve-Santu kusosa beno kimakangu, mpe ti beno kusosa kimakangu na manima mpe kutuba, “Yinga, Mfumu,” to kuzonza na lembami.

²⁴¹ Yandi ke zonga na lembami, “Beno kwiza na Munu, beno nyonso yina me lemba mpe kele na bizitu ya kilo ya mingi. Mu ke pesa beno Kupema.”

²⁴² Mpe beno ke tuba, “Ah, mu kele ntwenya. Mu fwana... Oh, pasteur ya munu ve... Nyonso mu fwana sala...” Beno me mona? Ata mbala mosi ve ti beno ke mona Yawu.

²⁴³ Kasi ntangu beno ke tuba, “Yinga, Mfumu. Mu me kuwa Ndinga ya Nge. Mu me kanga ve ntima ya munu. Mu ke kipe ve, Mfumu, Yawu kele Ndinga ya Nge mpe mu ke kwikila Nge. Baka munu, Yesu, ‘Kaka mutindu mu kele, kukondwa kima na munu, kasi kaka Menga ya Nge yina basikaka samu na munu. Mpe kuna mu ke sila, “Mu ke kwikila.” O Mwana-dimeme ya Nzambi, mu me kwiza.” Beno tula maboko ya beno na zulu ya yintu ya Yandi yina ke na kufwa, beno tuba, “Mfumu, mu kele musumuki, mpe Nge me bokila munu.”

244 “Nyonso yina Tata me pesa Munu ke kwiza na Munu, mpe Mu ke vumbula yandi na bilumbu ya nsuka.”

245 “Yinga, Mfumu, mu me kwiza. Mu me kanga ve ntima ya munu, mutindu bawu salaka na ntangu ya kumanga kutumama, kieleka mu me kwikila.”

246 Kuna yinki Yandi ke sala? Yandi ke pesa beno Luzingu ya Yandi, *Zoe*, Luzingu ya Kukonda nsuka. Mpe kana Nzambi lenda telemisa beto na fundu-fundu ya ntoto, kisika beto me katuka. . . . Beto me katuka na fundu-fundu? Nyonso yina beno ke mona, me katuka na fundu-fundu. Mpe kana Nzambi lenda sala munu yina mu kele bubu yayi, kukondwa kuzwa nsodolo mosi ya kusala; kaka samu ti luzolo ya Yandi vwandaka ya kusala munu, mpe kupesa munu ntangu ya mbote ya kukutana na Calvaire mpe kubaka lukanu ya munu; mpe mu me baka lukanu ya munu mpe me kwikila na Yandi; wapi mutindu ya kulutila Yandi ke vumbula munu! Kana Yandi salaka munu yina mu kele, kukondwa nsodolo, kuna mu me sala nsodolo mpe me ndima Yandi na kati ya munu; mutindu Yandi tulaka maboko ya Yandi na Yandi mosi, mpe kudyaka ndefi na Yandi mosi, ti Yandi ke vumbula munu na kilumbu ya suka. Mu ke pema na kivuvu.

247 Mu ke Kupema, ve samu ti mu me sambila na Lumingu, ve samu ti mu me sambila na saba. Ya kele ve na kima ya kusala na yawu. Mu ke sambila samu ti mu me kota na kati ya ngemba mpe Kupema ya Yandi: ngemba, kupema, luzolo, kyese. Ti mipepe bula; kizundu ya munu kele ya kusimba mbote.

248 Beno kele na kimbangi yango, na nkokila yayi, nkundi ya munu yina kele ya kuvwanda awa na tabernacle ya tiya yayi? Beno me kwiza ve samu na kuwa munu. Ve. Beno me kwiza na kuwa Ndinga. Beno kuwa, nkundi ya munu.

249 Ntangu yayi kana beno kele ve na Kupema yango, beno lenda tala Yawu malu-malu yayi. Beno ke na nsatu ve ya kubelama awa na chaire. Beno vwanda kaka kisika beno kele. Beno vwanda ya kusungama, mpe beno tuba, “Klisto, tuba kaka na ntima ya munu. Mu zaba ti ya kele tiya. Munu—munu nyonso me toka kaka, me tukuta. Mu kele na boma. Kasi, kieleka, Mfumu, mu lendaka tukuta na mpasi, kulutila yayi, tekila suka.”

Mpe dokotolo lendaka ningisa yintu ya yandi, kutuba, “Ya kele ntima me kangama. Yandi me kufwa.” Na manima yinki?

250 Na manima yinki? Ntangu Buku ya nene ke funguka, na manima yinki? Beno me kuwaka nkunga yina, *Na Manima Yinki?* “Ntangu bayina me manga Nsangu, ba ke lombi bawu na kupesa kikuma, na manima yinki?” Na manima yinki? Beno banza na yawu ntangu yayi, kieleka na mudindu mingi.

251 Na yina beto ke kulumusa yintu ya beto, beno banza na yawu.

Ntangu yandi yayi yina me manga Nsangu yayi
na nkokila yayi,
Ba ke lomba yandi na kupesa kikuma, na
manima yinki?

Na manima yinki? Na manima yinki?
Ntangu Buku ya nene me funguka, na manima
yinki?
Ntangu bayina me manga Nsangu yayi na
nkokila yayi,
Ba ke lomba beno na kupesa kikuma, na
manima yinki?

252 Tata ya Mazulu, yayi kele nyonso na maboko ya Nge ntangu yayi. Awa kele Saba ya kieleka ya kuvwanda na ntwala ya bantu. Awa kele Wanzio ya Nzambi, samu na mwa bamvula ya nsuka, me bula na yinza nyonso. Bakutonga mpe nyonso yankaka me, meka na kufundisa Yawu. Kasi, konso ntangu, Nge me monisa Nge mosi kuvwanda Nzambi.

253 Yinza ya science, dibuundu ya yinza; bawu kele ya kufwa meso, Mfumu? Ya lendaka vwanda ti mosi na kati awa na nkokila yayi ke zola kuzwa kumona, samu na kulandila na kutambula, mpe kumeka Nzambi ve, mutindu na bilumbu ya kusokisa; ve na kumeka na kumeka Yandi, na kuvwanda mbote na Lumingu, to kuzitisa kilumbu mosi, to na credo mosi, to na kuvwanda ya dibuundu mosi. Kasi ke zola kubasika mpe kuzwa nzengolo, na ntima, mpe kuzwa Mpeve-Santu. Mpe bawu zola Yandi. Na nzila ya lukwikilu ntangu yayi, bawu ke na kumekaka na kundima Yandi na kati ya ntima ya bawu. Bawu ke na kumekaka na kuzwa lemvo na Nge, Mfumu.

254 Oh, mu banza ti bawu kuzonzaka na bandinga. Mu banza ti bawu kubokaka. Bawu ke dasuka dyaka mutindu na ntama. Bawu kele dyaka mayele ya yimbi mutindu na ntama. Bawu ke tonga mpe ke zonga dyaka, mpe ke sala bima yina bawu zolaka sala ve. Bawu zola yawu ve, Mfumu. Na manima yinki, ntangu Buku ya nene yina ke funguka, yina ke tuba, “Bayayi ke kota ve na Kimfumu?” “Na yawu beno vwanda ya kulunga, mutindu Tata ya beno na Mazulu kele ya kulunga.” Nyosno yina kele ve ya kulunga ke kota ve. Bawu ke na kusala kieleka kivuvu, na nkokila yayi, na Kulunsi? Kana ve, Mfumu, ti bawu sala “yinga” mosi yina ya Seko kaka ntangu yayi.

255 Beno tuba, “Mfumu, munu . . . Kuningana ya nzutu ve, kasi mu ke na kuwa kaka Kima na yisi ya ntima ya munu, yina Kima mosi ke na kutuba na munu, ‘Mu lenda sala yawu malu-malu yayi, na lemvo ya Nge.’ Mpe mu ke na kundima Nge mutindu Mvulusi ya munu mosi. Mu ke na—mu ke na kumanga bima nyonso ya yinza, mpe mu zola kukota na Kupema ya Nge. Mpe mu ke kwikila ti mu ke na kusalaka yawu malu-malu yayi. Mu

ke kwikila ti Mpeve-Santu ke na kunata munu mbala mosi na kati ya kisika yango.”

256 Na yina bayintu nyonso kele ya kukulumusa. Ya kele na muntu yina ke na kuwa mutindu yina malu-malu yayi? Beno telemisa diboko ya beno, “Mpeve-Santu ke na kunataka munu ntangu yayi na kisika yina mu ke tonga dyaka ve.” Nzambi kusakumuna beno. “Mu ke sala dyaka ve bima yina. Kudasuka ya munu me kwenda. Mu lenda zinga na ngemba mpe kyese mpe mvibudulu, katuka ntangu kaka yayi. Mu ke kwikila ti Nzambi ke na kuzonzaka kaka na munu ntangu yayi, ti mu lenda sala yawu katuka ngunga yayi, na lemvo ya Yandi.” Beno zola kutelemisa maboko ya beno? Nzambi kusakumuna beno. Nzambi kusakumuna mama ya ntwenya. Muntu yankaka? “Mu ke kwikila ntangu yayi.”

257 Beno tonta Yandi ve, mutindu na kilumbu ya kumanga kutumama. Beno banza ve samu ti beto ke kwendaka na dibuundu na Lumingu, to ke zitisaka saba. Paul tubaka, “Beno bayina ke zitisaka bilumbu to bangonda, to nyonso yina, mu kele na boma ya beno. Musiku na kuvwandaka kinsinsya ya bima ya mbote yina ke kwiza, mpe ve kizizi ya kieleka ya kima mosi, lenda ata mbala mosi ve kusala musambidi ya kulunga.” Kasi Klisto ke sala beno ya kulunga, ya kulunga na meso ya Nzambi. Yandi ke katula disumu ya beno, ke katula kitumbu na beno, ke pesa beno zola mpe kyese ya Yandi.

258 Beno zola kukota na kupema ntangu yayi? Muntu yankaka telemisa diboko ya yandi, tuba, “Mu me sala yawu.” Nzambi kusakumuna nge, mama ya ntwenya, na lweka awa ya kento. Nzambi kusakumuna bakala ya kuvwanda na bakala ya munu. Kukota na Kupema ya Yandi, beno banza kaka na yawu ntangu yayi.

259 Beno sambila, “Kaka mutindu mu kele, Mfumu, kukondwa kima mosi; ya mbote ve kele na munu. Kima ve mu lenda kupesa Nge, kasi kaka luzingu ya munu ya ntama, ya kubeba, ya masumu. Nge zola kuyamba munu? Kuvedisa munu? Kusadisa munu? Samu ti, mu me sila ti mu ke kwikila. O Mwana - dimeme ya Nzambi, mu me kwiza. Mu me kwiza ntangu yayi, na kukwikilaka ti ntangu yayi mu me luta lufwa na Luzingu. Samu ti, kaka awa na kisika ya munu, mu me ndima Nge mutindu Mvulusi ya munu mpe mu ke na kuwa ngemba na kati ya ntima ya munu.”

260 Bantu tanu me telemisa maboko ya bawu. Muntu yankaka, yina ke na kuwa mutindu yina zola, kutelemisa diboko ya yandi? Kana beno kele ve Muklisto, beno ndima Yandi kaka ntangu yayi.

261 Kana beno ke tuba kuvwanda Muklisto mpe kele ve mutindu yina, beno kele dyaka musumuki, ata wapi luzingu yina beno—beno me nata, to mutindu beno ke meka na kusala beno mosi.

Yina beno ke sala kele ya kundima ve. Ya kele yina Yandi salaka. Kusungama ya beno mosi ke ndimama ve. Kana beno kubika kunwa tabaka kaka samu ti beno me tuba, “Mbote, mu ke sala mbote na kubika kunwa makaya samu ti mu ke zonzilaka Buklisto,” Nzambi ke ndima yawu ve. Kana beno ke bika kulula bakento, kaka samu ti beno ke na kusala beno mosi kusala yawu, Nzambi ke ndima yawu ve. Ya kele kima beno me sala. Ya kele bisalu. Ya kele lemvo yina ke vuukisaka beno. Nzambi me kwiza na beno mpe me basisa kima nyonso na beno? Ya kele kima yina ke landa.

²⁶² Beno ke tuba, “Mu me kuma ya dibuundu, mpe na yawu mu zolaka bika bima yayi.” Nzambi kundimaka yawu ve, kima mosi ve beno lenda pesa. Yandi ke ndimaka kaka yina Klisto ke pesa. Yandi ke pesa beno Luzingu ya Kukonda nsuka, mpe ke katula yawu na beno. Beno zola kuzwa Yawu?

. . . mupepe ya ngolo, lenda kubula na mubu,
Kwiza, kanga moyo ya nge na dibungu ya
Kupema,
Mpe tuba, “Ya munu ya luzolo kele ya munu.”
Mu me kanga moyo ya munu . . .

Mbote mingi, beno lenda vumbula yintu ya beno. Nsangu me manisa awa. Beto sambila kaka ntangu yayi.

Mu ke sabuka dyaka ve mubu ya kudasuka;
Mupepe ya ngolo lenda bula, mupepe na
mudindu,
Na Yesu mu kele ya kukeba ntangu nyonso.

²⁶³ Bantu nyonso ntangu yayi, na kati ya kisambu.

Mu me kanga moyo ya munu na dibungu ya
Kupema, (Saba)
Mu ke sabuka dyaka ve mubu ya kudasuka;
Mupepe ya ngolo lenda bula, mupepe na
mudindu,
Na Yesu mu kele ya kukeba ntangu nyonso.
Sema na zulu ya munu, . . .

Beno kumipesa kaka beno mosi. Beno kanga meso ya beno. Beno ke na kuwa Mpeve yango ya lembami? Ya kele kusambila. Nsangu me manisa. Yayi kele kusambila.

Ti Nsemo ya phare kusema na zulu ya munu,
O sema na zulu ya munu, O Mfumu, sema na
zulu ya munu,
O ti Nsemo ya phare kusema na zulu ya munu.

²⁶⁴ Bantu yikwa ke na kuwa kieleka mbote? Beno telemisa diboko ya beno. Ya kele Yawu, mpeve yango ya lembami, ya kulemvuka.

Kuvwanda mutindu Yesu, kaka kuvwanda
mutindu Yesu,
Na zulu ya ntoto mu zola kuvwanda kaka
mutindu mosi na Yandi;
Nzyetolo ya luzingu ya munu nyonso na ntoto
tii na Nkembo,
Mu ke lomba kaka na kuvwanda mutindu . . .

Beno sambila kaka.



HEBREUX, KAPU YA YIYA KING57-0901E
(Hebrews, Chapter Four)

BANDANDANI YA BUKU YA BA-HEBREUX

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na nkokila kilumbu ya 1 ya Ngonda ya yivwa, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org